


拜經樓藏書題跋記附錄二






叢書集成

初編

商務印書館

貴州省圖書館
中文舊書



J
17.8
1
1.55

拜經樓藏書題跋記

附錄

(二)

吳騫撰
吳壽陽輯錄

叢書集成初編

(補印本)

拜經樓藏書題跋記

附錄

二冊

一九三九年十二月初版

一九五九年十月補印

吳 騫 撰

吳 壽 陽 輯 錄

商務印書館出版

上海市印刷四廠印刷

拜經樓藏書題跋記卷四

纂圖互注老子

宋本纂圖互注老子二卷。卷首序題太極左仙公萬元造。每葉二十四行。每行大字二十。小字二十三。有方鑿時鳴私印。方而怡際明父圖記。

真經道德指歸注

真經道德指歸十三卷。題蜀郡嚴遵字君平撰。谷神子注。卷首爲總序。並元德纂疏。先君子跋。見愚谷文存。又別錄四庫全書提要簡明目錄。渭南文集。郡齋讀書志。衢本蜀本讀書敏求記。各條爲一冊。四庫提要目錄云。曹學佺作元羽外編。序稱近刻嚴君平道德指歸論。乃吳中所僞作。今案通考晁氏之言。案此條通考所引。與今本讀書志不同。先君子書云。通考所引讀書志乃衢本。世行板本乃蜀本。故互異也。又谷神子注本。晁氏尙著錄十三卷。不云佚闕。此本載谷神子序。乃云陳隋之間。已逸其半。今所存者。止論德篇。因獵其譌舛。定爲六卷。與晁氏所錄亦顯相背觸。且旣云佚其上經。何以說目一篇獨存。至於所引莊子。今本無者十六七。不應遵之云云。先君子又書云。按六卷本指歸論。前列谷神子序者。安知非明末人從十三卷中鈔此序。以竄卷首。晁氏所云十三卷。谷神注。今道藏尙有之。原未嘗佚闕。所稱莊子曰。卽君平。以旣諱嚴。卽稱莊子。誤認爲子甫。殊費詞矣。

晏子春秋

元刻本晏子春秋八卷。篇目內如首章莊公矜勇力不顧行義。晏子諫第一後同。明時本作諫矜勇力不顧行義。不書全題。又篇內按語俱作大字。加圓圍以別之。明時本則作小字。分注于下。與此復然不同矣。惜首闕半頁。有書帶艸堂款。冬書屋馬叔靜圖書記。諸印紙墨俱古。抱經堂羣書拾補云。劉向斂錄云。定著八篇。二百一十五章。予所見者。明吳勉學本。止七篇。二百三章。今陽湖孫氏星衍得沈啓南吳懷保本校梓者。分八篇。多十二章。與斂錄之數適合。今此本篇章亦同。學士曾借校。並補刻全目於後。書云。余校晏子將竣。吳槎客示余元人刻本。其每卷首有總目。又各標于當篇。今本皆缺目錄。以此補之。

又

明鈔本晏子春秋。作四卷。卷三後書萬曆十六年冬吳懷保梓。卷一後書崇禎十三年庚辰閏四月初六日。校錄於雪履齋。仁和郭紹孔伯翼甫識。蓋即從吳刻本傳錄者。末附柳宗元辨晏子春秋一篇。史記管晏列傳及孔叢子六條。按文獻通考引崇文總目。晏子春秋十二卷。晏嬰撰。原釋晏子八篇。今亡。此書後人采嬰行事爲之。以爲嬰撰。則非也。錢侗按。玉海引崇文總目。隋志。舊唐志。七卷。今本八卷。書錄解題。晏子春秋十二卷。齊大夫平仲晏嬰撰。漢志。八篇。但曰晏子。隋唐七卷。始號晏子春秋。今卷數不同。未知果本書否。蓋晏子八卷。早佚。後人采嬰行事爲之。加以春秋之名。其作八卷者。猶仍漢志之舊。此併爲四卷。且篇目不載全文。視前舊刻本。漸失古意矣。惟崇文總目。書錄解題。俱十二卷。而四庫書目及余家舊

刻作八卷。疑又經後人併合。以符漢志八篇之數也。

曾子

元本曾子二卷。內外篇凡十四。每卷題傳道四子書曾子卷第。次有達左序。每篇末引宋諸儒說。及達左按語。自大戴禮中錄出者。凡十篇。有楊簡注。他若汪暉、趙汝騰、劉清之、章樵、宋鳴梧、曾承業、戴良所編。分見於儲藏家著錄。蓋此書原本早佚。諸家各據當時所傳之本。互有編輯。卷第分併。亦各不同耳。

荀子

元本纂圖互注荀子二十卷。每葉二十二行。每行大字二十一。小字二十五。序目不全。盧學士校刻荀子。曾借校。其讎校學士舊刻。斂此書云。元刻纂圖互註本。此乃當時坊間所梓。謬差舛。不一而足。然正以未經校改之故。其本真翻未盡失。書中頗多採用。

呂氏春秋

呂覽二十六卷。元刻本。卷首有遂昌鄭元祐序。序後有嘉興路儒學教授陳泰。至正十下缺。吳興謝盛之刊一行。每葉二十行。每行大小字俱二十。有南書房史官海甯查慎行。字夏重。又曰悔餘。得樹樓藏書諸圖記。蓋曾爲初白先生收藏。序首缺半頁。先生手書補全。先君子識箴云。此元初刻本。序文前半頁。乃查初白先生手筆鈔補。真如白獺髓矣。兔床志。前副頁附松靄先生手札云。呂覽卷二十一慎行論中有緩氣之說。不獨充板。明板亦不刪。已檢得矣。籠口之說。大約在淮南子注中。弟處淮南子。乃明刻本。有批

點者注極略。鄴架所儲。或係別本。望便中查示。再呂覽匆匆閱過。俱縱目力所至。恐尙脫漏。並乞留神再檢爲感。

太元經

宋本太元經十卷。後附王涯說元五篇。太元經釋文一卷。萬玉堂刊本。有右迪功郎充兩浙東路提舉茶鹽司幹辦公事張實校勘一行。每葉十六行。每行大小字俱十七。中多缺筆避諱之處。有子孫保之。太師趙氏世德堂印。長川吳氏諸圖記。盧學士借校。原缺三卷。學士影鈔補全。摘錄陸續述元數行于首頁。並記云。又有說元五篇。唐宰相王涯字廣津纂。又有太元經釋文一卷。注云。此本自侯芭。虞翻。宋衷。陸續。互相增損。傳行於世。非後人之所作也。按是書紙色甚舊。每卷署晉范望字叔圖解贊。卷末有云。楊氏本自元首已下。至元告。凡十一篇。並是宋衷解詁。陸續釋文。共爲一注。范望采二君之業。折衷長短。或加新意。就成此注。仍將元首一篇。加經贊之上。元測一篇。附逐贊之末。餘自元衝以下。至元告九篇。列爲四卷。三家義訓。互有得失。以待賢者詳而正焉。卷三後。先君子書云。嘗收得萬玉堂舊刻太元經。紙墨頗佳。前葉印記彙彙。蓋橫塘吳氏會藏之。惜前闕三卷。無從物色。錢塘盧紹弓學士續補方言時。嘗借觀之。亦惜其不全。閱數年。學士掌教晉陽。偶借得全本。因憶及予家缺卷。亟令楷書手爲補錄三卷。從數千里外寄余。俾成完書。其好古懷友之心。均非近人中所有也。爰識于此。俾後人知是書獲全之始末云。乾隆癸卯夏仲。兔床吳某。

賈子新書

右新書十卷。明正德九年陸良弼刊本。有黃寶序。先君子以欽遠猷校本過錄於上。每卷首題新雕賈誼新書。下題梁太傅賈誼。目錄後有建甯府陳八郎書鋪印一行。前有袁氏宋本校過一行。並補審取舍篇於過秦目下。係以何孟春跋語。及己亥三月遠猷題記。又卷末書云。賈子世無善本。互有訛缺。今集彬陽何氏本。長沙本。武陵新本。及此本。參相去取得正其十之四五。不可攷者。仍闕以俟。別本更訂。己亥三月十有二日燈下書。遠猶按遠猶。卽欽遠猷。抱經堂盧氏本。所稱李空同本。正德八年刻。後有欽遠猷者。不知何時人是也。又謂何氏於文義不順者。頗加竄改。又於過秦論後。補審取舍一篇。乃錄大戴禮察篇全文。今不用。其宋本。當卽盧氏所謂建本。明毛斧季。吳元恭。皆據以改近世之本者是也。以有建甯府陳八郎一行。故稱建本云。

又

右盧氏抱經堂本。先君子以明刻大字本校至二卷止。記前云。乙巳夏五。有書賈持明刻賈子一部。欲售於予。先爲汪氏映月軒所得。因借閱之。其字視今時本頗大。前有黃寶序。已不全。似卽所謂陸良弼在長沙所刻本。是日手校二卷。屬有事未竟。他日當再借以卒業也。槎客記。又書卷末云。抱經學士校刻此書。具費苦心。可謂有功於長沙者。某嘗觀明何燕泉餘冬序錄中。述賈誼新書數條。語甚詳。燕泉并有校定重刻本。書此以俟。他日更訪求之。辛未人日。免牀又志。

風俗通

風俗通義十卷。前有邵自序。元大德丁未。大中大夫行都水監李果序。後有宋嘉定十三年東徐丁黼跋。卷首題大德新校正風俗通義。每葉二十行。行十六字。卽抱經堂羣書拾補所稱大德本者是也。拾補載李跋作李晦。與此異。尙有謝居仁跋。此本無之。而有嘉定十三年丁黼跋。知此本從宋本出也。按謝序。予觀風西浙。至無錫。有耆儒李顯翁晦來訪云。據此李字顯翁。則當名晦。此本作果。疑誤。王西莊光祿所藏大德本。亦作李果。

說苑

說苑二十卷。宋刻本。每葉十八行。行十八字。卷末題咸淳乙丑九月鄉貢進士直學胡達之際役。迪功郎改差充鎮江府府學教授徐沂。迪功郎特差充鎮江府府學教授李士龍命工一條。仁和孫頤谷侍御跋云。海昌吳兔牀先生以宋本說苑見示。乃咸淳乙丑所刻。予取以校叢書程氏榮刻本。其立節篇云。比干殺身以成其忠。尾生殺身以成其信。伯夷叔齊殺身以成其廉。程本脫尾生句。則與下文舉忠。舉信。舉廉之語不應。又復恩篇。蘧伯玉得罪於衛君一則。程本所無。此舊刻之可寶。然予尙有疑者。晁氏郡齋讀書志。敘說苑篇目。避宋孝宗諱。易敬慎爲法誠。而此本不易。且李善文選注。及太平御覽諸書。所引說苑。閒出今二十五篇之外。王厚齋。南宋人也。撰困學紀聞。引晉靈公造九層臺。荀息上書求見云云。此本亦無之。則是書之闕佚者多矣。校勘旣竣。因遺其書。而錄所疑於後。甲辰二月。仁和孫志祖跋。吳門黃蕘

圃主事跋云。此咸淳乙丑九月重刊本說苑。拜經樓藏書也。余友海甯陳君仲魚。知余新得宋刻廿二行廿字本。較諸本爲勝。因取是本相示。余校讀一過。與向所見顧抱冲本相同。而字之正誤。彼此互異。當是版有原與修之別。印有初與後之殊也。其妙處。卷四立節篇有尾生殺身以成其信一句。卷六復恩篇多木門子高一條。自明天順本以下皆無之。則信稱善本矣。惟是卷六陽貨得罪條。多非桃李也四字。余本爲然。與紹弓盧學士羣書拾補引御覽合。此猶失之。其他與余本異者。亦復彼善於此。此真宋本之乙邪。內闕第十四卷。向未標出。惟抱冲本可補。抱冲本亦闕八至十三卷。此本可補。惜抱冲已作古人。拜經又居他邑。彼此鈔補爲難耳。丁卯小春望日讀畢。復翁黃丕烈。是本紙墨古雅。每卷末有黃鑿亭藏書圖記。第十四卷從別本鈔補。先君子書孫跋後云。甲辰春。偕丁小疋學博過頤谷侍御齋。予以宋版說苑。侍御旋爲予作跋。屈指今十載矣。癸丑夏。展閱此書。并錄其跋于卷後。因識。又云。此書爲吾鄉陳茂才以岡舊藏。予用善價購得。兒壽照甚愛之。丁未春。計偕入都。攜之行篋。舟車往返。未嘗暫離。不意旋染目眚。廢書者四五年。展閱此書。慨焉寤歎。

帝範

右四卷。知不足齋叢書校刻本。綠飲先生記面頁云。第三次校修。先君子又爲覆勘。書後云。戊戌冬夜。橫河舟次。用吳郡黃省曾嘉靖己丑刊本。讎勘。凡拈出八十餘處。

近思錄續錄

近思正續錄二十三卷。宋刻本。每葉二十六行。每行大字二十四。小字二十五。六字不等。紙墨精雅。有東谷武原鄭氏圖記。蓋端簡舊藏。彌足珍重。

太平廣記

右明刻本。□十□卷。簡莊先生依宋本手校。先子跋云。此明刻本。太平廣記。爲譚愷開雕。較世行坊刻。猶有古意。卷首有郁逢慶叔遇圖記。按叔遇嘉興人。性喜收藏書畫。崇禎中嘗手輯古今名人法書名畫題跋記。正續各十二卷。可與汪氏珊瑚網。孫氏庚子銷夏記。相頡頏。惜未有爲刊行者。此書間有關番。皆郁氏原補。而陳仲魚孝廉。復依宋板爲予手校一過。尤可爲插架之良本矣。嘉慶癸酉立春日。八十一叟吳某志于西蓀。

纂圖互注文中子

宋本纂圖互注文中子十卷。前有文中子纂事世系年表一篇。題河汾肆子王壬。無目錄。有阮逸序。末卷敝篇後。爲杜淹文中子世家。錄唐太宗與房魏論禮樂事。關子明事。書錄解題云。唐志五卷。今本第十卷。舊傳以此爲前後序。王福時王氏家書雜錄等。此本與前纂圖互注老子同。紙墨俱佳。有海昌馬思贊印。中安一號漁邨圖記。

鑑誠錄

鑑誠錄十卷。影宋鈔本。先君子書後云。右鑒誠錄十卷。後蜀東海何光遠輝夫所撰。晁氏讀書後志謂其

在唐證中纂輯。唐證未詳其義。觀所紀多唐末五季及西蜀時事。昔朱竹垞檢討嘗得宋槧本。乃項氏天額閣舊藏。首闕劉曠度序。此本從金閭宗人伊仲借錄。蓋影宋鈔也。劉序亦無。閒多闕文。聞桐鄉金雲莊比部新購得宋刻本。亦有闕文。未知與此本同否。當更借校之。乾隆丙午閏七月十五日。兔牀吳某識。

文心雕龍

胡夏客曰。隱秀篇舊脫四百餘字。余家藏宋本獨完。丁丑冬。復得崑山張誕嘉氏雅芭絨寄家藏鈔本。爲校定數字。以貽之朋好。夏客字宣子。海鹽人。孝韓先生子也。然據所錄補四百餘言。尙不無魯魚。爰復爲校訂。錄於僊壺。權客吳某記。

灑水燕談錄

右十卷。明商氏稗海刻本。緣飲先生於乾隆甲辰。嘉慶壬戌。兩次從宋本校。均譏歲月于後。丹黃排比。幾徧。并於卷首補錄紹聖二年自序。先君子書云。稗海中所刻書。多芟節譌謬。而灑水燕談錄。其尤也。往嘗見吾友鮑綠飲有宋本最善。未及借校。時往來於心。頃綠飲特爲予取是本。而手校數過。遂成善本。後人其珍之。倘有好事者。依此重刻。則更藝林一快事矣。癸亥三月。兔牀吳某志。時年七十又一。原本忠孝才識爲四卷。依宋本。卷五高逸一門。仍是第四卷。以下遂遞差一卷。先君子記後云。前原序自云十卷。今據綠飲所校。則止有九卷。豈此下尙少一卷乎。當更叩之參軍耳。

雲麓漫鈔

雲麓漫鈔十五卷。先君子從知不足齋借本傳錄。手自校正。用硃筆。並屬朱巢飲先師校。用綠筆。十卷後有綠飲先生跋云。雲麓漫鈔。刻於商氏稗海者。祇四卷。此本傳自趙氏小山堂。較商氏所刻。已多過半。而宋詩紀事及南宋雜事詩所引。李易安投翰林學士。綦崇禮書不在焉。然則此尚非全書耶。更當覓善本訂正之。乾隆壬午端午後一日。知不足齋識。又云。曹彬侯跋清波雜志。云雲麓漫鈔二十卷。則此亦僅有其半耳。丙戌五月廿有九日。蘆渚寓舍書。又書十五卷末云。乙未十二月十二日。得十一卷。至十五卷于小山堂。李清照啓。載十四卷中。觀自序。則此書祇十五卷。曹所云二十卷者。恐未足據耳。先君子書後云。庚子夏日。從綠飲借得雲麓漫鈔十五卷。因爲傳錄。并倩朱君允達校而藏之。拜經樓。按此書。書錄解題亦作二十卷。又續鈔二卷。乃中庸說及漢定安公補記。然藏書家率未聞有。豈不傳耶。俟續訪之。吳某。簡莊徵君從予家借錄。跋云。嘉慶十一年夏日。從拜經樓借得是本。攜至吳中。今年春。始得情人傳鈔。甫竟。遂手錄綠飲前後三跋。并拜經樓主人所跋所評。細校一過。至吾師朱子。則稱師云。以別之。適綠飲扁舟過吳。見訪。相與把玩。爲之一快。且謂余曰。此書尙缺圖數頁。故未刻入。知不足齋叢書。綠飲年八十矣。尙健飯。行不扶杖。時攜書卷往來杭湖嘉蘇數郡間。其好古清興。正復不異昔日也。嘉慶十二年四月望日。郭海陳燮記。

容齋五筆

右影鈔舊本。原有硃筆評校。先君子復借知不足齋所藏義門先生評校本過錄。書後云。乾隆辛丑春日。

偕鮑君以文遊武原。有書估謁予舟次。攜鈔本容齋五筆求售。有硃筆評校。蓋陳宋齋先生筆也。因酬以直得之。復從鮑君借所藏何義門先生評校本。用藍筆點次。鮑本末復有筠溪照跋。不具錄。壬寅冬日。兔床吳某識。義門跋云。前四筆皆十六卷。而此止于十卷。蓋未成而公已□□□□之已五年。今始粗閱一過。予之廢學亦可見矣。去年□□□□書頗多。咸以爲非計。不知都下借書。至不易得也。冬閒□□□□滯大定。精舍鄉人以會試至者。謂予曰。所攜書亦曾看過□□□否。予愧謝之。然能於半歲中閱三四千卷。雖古人或難之。鄉人殆不識甘苦之語。以警予之惰。則可耳。又五月二十一日。沂州奈園書塾書。肥瞻康熙乙未十二月重閱□□□中至正月三日而畢。去甲戌客臨沂時。已二十餘年矣。予精神日已向衰。讀書所向抵滯。聰明非復當□□□之留示餘兒。少小當早自鞭策也。

默記

默記一冊。巢飲先師手寫本。先君子校。並錄朱朗齋鮑綠飲二先生校文于上。記簡端云。朱鮑校俱用硃筆。兔牀校先用紫筆。繼用綠筆。後有葉石君跋。謂湖賈攜舊鈔本至。先爲林宗取去。林宗本尙有五總志。鮑跋云。五總志南宋吳迥所撰。世多未見。予近始得之。因自歎耽書之癖。不減昔人所恨。林宗石君輩不見我耳。乾隆甲午秋日。廷博朱跋云。甲午九月廿五日。鮑綠飲以此本屬爲校勘。因合汪氏飛鴻堂汪氏振綺堂藏本互勘。三本皆善矣。朱文藻又鮑跋云。朱君映澗校訖見還。予取飛鴻堂本重勘。復是正數十處。然飛鴻堂藏本不佳。尙有譌脫。無從改定。亦一恨也。九月二十七日。燈下記。先君子跋云。

明日海昌吳某復從知不足齋主人借觀。據其所見。筆之簡滿。又不下數十處。而此外譌舛者。亦尙有數處。終未能釋然。此昔人所以有風庭掃葉之歎歟。又跋云。癸巳歲。予借得以文本。吾友朱君雲達爲予手鈔。且以意改其亥豕。藏之篋衍。今予又得朱鮑二君從汪氏二本校過者。凡此一書。合四家藏本。經四人手眼。吾輩之好書。可謂勤矣。他日以示雲達。當更爲之忻然也。甲午十月二十七日。橫河舟次。魏牀再志。

簡莊徵君從予家借鈔書後云。丙申七月二十七日。余從拜經樓借閱。因亟命胡生風苞鈔之。至八月二十七日鈔畢。其請家校本。仍照各色書之。更有一二改正處。則用黃筆合觀之。恍似文通夢中五色筆矣。鱸識。吾鄉有王性之廟。不知卽撰默記者否。俟攷卷後有葉石君跋。按石君名萬。吳之東洞庭山人。晚家琴川。聚書數萬卷。多手校過。余每思其人。近日修地志者。不載其姓氏。殊恨事也。所云五總志。當更從綠飲處借鈔。仲魚載筆。

吳禮部別集

右鈔本一册。先君子從知不足齋借錄。書後云。乾隆丁未秋仲。從鮑君以文借鈔。按卷首題卷一。而尾書卷下終。書則止一卷。且書中有云。詳下卷而未見者。疑尙有關佚。當面質鮑子某記。

塵史

鈔本塵史三卷。先君子手校本。按抱經堂文集書後云。記其本朝君臣事跡。頗可以資攷鏡。查輔初受學于鄭介夫。又嘗執經於胡翼之。其師友多賢者。故此書在宋人說部中爲最醇。又謂假得虞山毛黼季校

本自言得三本參校。而以何元朗所藏爲最善。此書舊有作四卷者。雖篇葉稍均。然非其本來也。故今所鈔。仍依三卷之舊。云此本亦三卷。未知視元朗本何如。當更訪之。

羅氏識遺

舊鈔本羅子蒼識遺十卷。後有隆慶三年姑蘇吳岫跋。簡莊徵君從先君子借校。書後云。嘉慶十五年十二月既望。從拜經樓借得是本。攜至吳門。以五硯樓袁氏鈔本校勘一過。補正良多。彼本亦誤者。未敢擅改。俟得善本再校也。郭海陳鱣記於石泉古舍。

離騷艸木疏

右舊鈔本四卷。後有仁傑自跋。及方粲跋。末列張師尹、杜醇、吳世傑、校正銜名。

紺珠集

右鈔本十三卷。龔氏玉璽瓏閣舊藏。有田居校。及江聲借閱題記。周耕厓先生曾從先君子借校。跋云。歲甲辰。客都門。分校續寫四庫書。中有紺珠集十三卷。原本字句錯誤。不可讀。爲校正二千餘字。重寫送館。另錄爲四冊藏之。王疎雨時爲吉士。見而借鈔。其前三冊已歸。會其改刑曹。後一冊久未鈔竟。丁未秋。將南旋。屢趣未得。念是書流傳甚少。不欲令棄前功。而行篋所有。非足本。攜歸亦無用。乃以前三冊併付之。其郎慶嵩嘗從予遊。屬鈔訖寄還。閱今八載。杳不通問。每一念及。未嘗不悵悵也。去夏。兔床七兄出此見示。欣然。如遇故人。前有橫河龔氏玉璽瓏閣珍藏圖記。又有龔稼邨秘笈之印。校者爲田居。爲江聲。免

牀云稼邨田居皆錢塘龔蘅圃先生翔麟自號玉璫璫本宋花石綱故物今尙在橫河姚氏宅江聲則金觀察志章別字蘅圃友也其本亦不免訛字然視原本則善矣其異者彼前題朱勝非譏而此無明文又多天順閒賀榮二後序耳假歸躡年事冗今始竟讀一過其書汰繁摘要便於檢閱衰拙善忘正苦無記事珠回憶旅牕矻矻樂此不疲自度已不能復爾而手校之本遂乃無可追索惜哉乾隆六十年乙卯七月十八日耕厓周廣業書

墨志

宣城麻三衡著金壽門先生手寫本內載元時造墨宜興潘材仲先君子書云某按元時宜興多造墨名手若吳國良吳善李文遠陶得和湯生不知其名並見倪高士集中贈詩甚多然則此書所遺漏者不少矣墨志一卷明季宣城麻氏孟璿撰凡分九類徵引賅詳論說古簡似兼李氏墨譜陸氏墨史之長考孟璿名著復社屯師姑山兵潰被執死甚烈蓋節義之士其緒餘故自足傳所作韻語已略載竹垞明詩綜而墨志未見諸家著錄近惟知不足齋所刊墨史中偶一附注亦希世之書也此舊鈔本傳自冬心先生魚豕甚多先祖亦嘗校閱未及細勘今春因蔣茂才生沐欲刊入叢書復悉心參校一過尙虞疎謬俟明眼者再審之道光戊戌孟夏之淳謹識

疑獄集

疑獄集三卷前二卷和疑編後一卷子彙續首有彙序及杜震序此鈔本乃吳氏太初所錄有其圖記太

初書後云。此冊乃余友鮑以文得於石倉吳氏。前頁有朱檢討手書竹垞鈔本。康熙戊子閏月。奉寄池北書庫。蓋錄以寄漁洋山人者也。按歸田錄。載魯公與馮相道在中書省問韓直。詬責小吏良久。及馮相語明。哄堂大笑。其素性褊急可知。而用刑一節。能采古人精察得情者爲疑獄集。以當韋弦之佩。亦可謂好學深思者矣。子顯仁中允。繼父志。彙成百條。勒四軸。今存六十六條。分上中下三卷。蓋佚去四分之一云。辛巳小春月。太初吳長元書於留耕艸堂。

三器圖義

右錄說郛本。先君子手校。

岳陽風土記

右一卷。明許嶽重刻本。有淳熙六年劉谷暨跋。明嘉靖甲辰陸擲。徐學謨二後序。

誠齋詩話

右舊鈔本一卷。曹氏古林書屋藏本。有權李曹氏藏書印。曹溶二圖記。

萬柳溪邊舊話

元允玘君玉撰。舊鈔本。末有曾孫實。七世孫晉二題跋。

百寶總珍集

右舊鈔本十卷。不著撰人名氏。

宣德彝器譜

右三卷。宣德三年呂棠奉勅編次。舊鈔本。

法界標旨乾坤體義

二種合爲一冊。釋智貴輯。廣溱校梓。明萬厯閒余永甯重刻而序之。書各三卷。

勾股矩測解原

右二卷。姚江黃百家原名百學。主一所著。卷首有沈廷芳印。椒園二圖記。

茶經

茶經三卷。簡莊先生鈔本。校正見遺。先君子書籤云。善本。簡莊贈。原本作卷上卷中卷下。此作卷之一二。三。每卷前有總目。

珩璜新論

珩璜新論一卷。先君子從畢氏鈔本補錄七條。書後云。乾隆乙巳殘冬。有書賈攜散浦畢氏舊鈔本珩璜新論來。書分四卷。末後多數條。因命史補錄。按晁氏讀書志。載孔氏雜說一卷。或云卽此書。果爾。則一卷者。乃舊本也。簡莊徵君復以所得本互勘。書後云。孔平仲所著談苑。說部中多有刻者。珩璜新論。流傳絕少。近從南匯吳稷堂座師處得一舊鈔本。中有竹垞圖記。凡遇宋朝故事。俱空一格。知出自宋刻。其書亦作一卷。不分爲四。但前有缺葉。後亦少數條。又多誤字。因從拜經樓借得是本。補鈔所缺。復互校一過。

是本舛錯亦多。甚有脫落數行者。可見傳寫之書。非經校讐。猶之蕪田不治也。校畢。遂題其後而歸之。嘉慶十八年二月既望。陳鱣書。

蘆浦筆記

蘆浦筆記口卷鈔本。爲同邑林善長先生所藏。有其手校及按語親筆。又有漁洋山人借觀一行。評語三條。末有昌詩後跋。及龔衛圃侍御田居跋。謂此帙借鈔于黃俞邨家者。與郁氏東歐軒藏本。當無大異。惟少按語一條。而多昌詩後跋。及龔跋耳。先君子審定。復經簡莊徵君。借鮑氏知不足齋本校。今歲重陽。徵君又於吳中黃蕘圃主事處。見所藏舊鈔。合校家枚庵先生手鈔本。內第五卷趙清獻充御試官日記。多三月三日。四日。五日事。第八卷立起行伍。爲趙立起行伍。又卷四巴邱條下。多以鄉得名。今撫州崇仁九字。爲向來諸前輩所未及者。並詳蕘圃主事跋語中。其餘字句之同異。更難枚舉。徵君得之。以校知不足齋新刊本。歸而見示。聆受之下。獲益宏多。因照錄于本。是本字句行款。多與黃本同者。然脫誤尙所不免。得此校補。洵稱完善矣。惟綠飲先生甫歸道山。不獲補刊。當屬嗣君清溪上舍。附刻校勘各條于後。以竟先生之志。而先君子手澤所存。未及以是相質證。敬展遺編。悲慟正無已爾。

霏雪錄

右鈔本二册。無序目。不分卷。後有胡謚。張文昭二跋。先君子題辭。見愚谷文存。此復錄明史本傳于前。記云。余既手校霏雪錄。復從萬季野先生明史列傳稿。見鐫續傳。亟錄于卷首。續字世熙。別本皆作孟熙。唐

錕、毛、蔡亦見浙江通志毛鉞傳。壬申十月望。樓客又志是本爲綠飲先生所貽。有世守陳編之家。老屋三開。賜書萬卷。歛西長塘鮑氏知不足齋藏書印三圖記。

棗林外索

舊鈔本棗林外索三集不分卷。每集有目錄。談孺木先生著。首有甲午秋七月自序。

董令升遺事附歸廬陵日記

右鈔本令升遺事。首李心傳繫年要錄。宋史禮志二篇。後列書錄解題。所著各種一條。先君子記云。舜所著又有嚴陵集九卷。天一閣藏本。見全書總目第一百八十七卷。又直齋書錄解題。有侍兒小名錄一卷。續一卷。序題朋溪居士。而不著名氏。始洪炎玉父集爲此書。王銍性之。溫豫彥幾續補。今又因三家而增益之。或云董彥遠家子弟爲之。某按彥遠爲道之字。則此二卷亦舜所著無疑。今此書未見有專行本。惟明商濬刻稗海中。有侍兒小名錄拾遺一卷。題宋晉陽張邦幾撰。但陳氏又曰。且爲分類。其中多用古字。今稗海本不分類。亦不見有古字。似經後人竄削。非復令升之舊矣。卷末附朱翌和令升詩跋云。某按董令升集罕傳。故原唱不可見。右數首。從潛山集錄附此。殆令升守新定時唱和之作。蓋長孺紹興中嘗僑居桐江也。令升又嘗有淵明先生集跋。惜未見。此冊後又附鈔周益公歸廬陵日記。起隆興癸未三月甲辰。止是年六月壬申。先君子記云。全集第一百六十五卷。摘錄宜興事。

日知錄

亭林先生日知錄初本八卷。後附誦觚十事。符山堂刻。先生書前云。愚自少讀書。有所得。輒記之。其有不合。時復改定。或古人先我而有者。則遂削之。積三十餘年。乃成一編。取子夏之言。名曰日知錄。以正後之君子。又自序。上章閣茂之歲。刻此八卷。歷今六七年。老而益進。始悔向日學之不博。見之。不卓。其中疏漏。往往而有。而其書已行於世。不可掩。漸次增改。得二十餘卷。欲更刻之。而猶未敢自以爲定。先以舊本質之同志云云。先君子書第八卷九州條下云。某按此二則。今刻全本。日知錄中不載。殆因闕百詩有駁正之語。故亭林遂削去之耶。詳見潛邱劄記。

又

右潘稼堂先生刻三十二卷。先君子以初本校。並有按語。又錄閩潛邱補正。及同邑許仲章先生評語于上。

又舊鈔本

右鈔本三十二卷。先君以校刻本。頗多增益。書後云。丙午秋日。得此書以志喜。簡莊徵君借校。記云。戊辰夏。自吳門至虞山。較閱一過。

菰中隨筆

右鈔本三卷。先君子校閱。有按語。復經胡維君、陳簡莊二徵君借閱。維君先生有粘簽數十條。後附詩律蒙告數葉。先君書云。自稱詩律蒙告一卷。而此只寥寥數條。恐非全本。

潛邱劄記

鈔本潛邱劄記七卷。後附日知錄補正一卷。先君子評閱跋云。林亭先生于上章闡茂歲。先刻日知錄八卷。板藏符山堂。後附譎觚十事者也。晚年更自序之。以爲中往往多疏漏。且書已行于世。不可掩。漸次增改。得二十餘卷。欲更刻之。而未敢自以爲定云云。今世所行日知錄三十二卷。乃潘稼堂太史手定而付梓者。然視未刻時原本。已不無異同矣。潛邱所見者。猶是初刻本。所補正已如此。使見全本。其舉正又當何如耶。吳某記。又云。潛邱之學。大約欲與玉峯抗衡。而經濟終不及。淵博亦遜之。錢塘馮山公嘗有潛邱劄記舉正若干條。見解春集。壬子春又記。

考正朱子晚年定論

右二卷。孫退谷先生著。有其自序。此鈔本。錢綠窗處士書後云。退谷著書甚富。以考正晚年定論爲第一。顧當時雖會鏤版。而流傳頗少。遠近積書家罕有藏弄者。友人吳君子安。偶於舊書中檢得。一日語次及之。遂假以歸。亟讀一過。見其考訂精確。陽明復生。不能不服。夫退谷本以該博稱。而能留心正學。息邪距諛。若此。殊不若邇來博綜家。沾沾於無用之辨。不急之察。語及程朱。輒笑爲腐且陋也。手錄一本。藏之笥。篋。謀重鍍梓。以廣其傳。卷末所載羅公書。殘缺不全。爲考整菴遺集補完焉。綠窗錢馥書。

西崑發微

右舊鈔本三卷。吳受著。首有自序。及朱鶴齡序。後復自係跋語。

榕城詩話

右三卷。國朝杭世駿著。有汪沅及杭自序。全祖望長歌。先君子校。並有案語。

東城雜記

右二卷。國朝厲鶚著。有杭世駿及厲自序。先君子手校。記簡端云。東城雜記二卷。從知不足齋借鈔。緣飲言此尙非足本。惟郁陞宜茂才東歐軒藏本最佳。當更求勘之。甲辰秋七月曝書日記。吳某又云。乙巳歲。吳門宗人枚菴借錄。又爲勘出數處。簡莊徵君書云。嘉慶十四年冬日。陳鱣借錄于吳門寓舍。并校一過。時方得樊榭徵君所著玉臺書史。因與拜經樓主人交易而觀。各鈔副本云。次年春正月鱣識。

又韓隨筆

右鈔本一冊。題隨筆癸亥集。前有叔紹貞序。稱爲又韓姪。而不著姓氏。先子跋云。癸亥集一冊。近從苕賈得之。據序稱又韓所撰。又韓未詳其姓名。似是禹航人。曾任麻城令。觀其書。亦一超覽之士。周芑兮大令讀之。謂予曰。明人著書。大概有二種。一爲升菴派。一爲眉公派。癸亥集蓋眉公派也。周之語雖如此。然視世之但知以爛熟八比取功名者。不大有閒哉。戊申長至後一日記。

沈氏弋說

先子跋云。己亥冬日。收得舊鈔沈長卿弋說一冊。蓋龍山查堯卿上舍藏本也。長卿字幼宰。杭州人。萬厯閒舉人。按千頃堂書目。沈氏弋說十卷。月旦六卷。今此編不列卷數。又無序目。疑非全書也。

山陽錄

山陽錄一卷。首有社禘米序。楊慧樓進士跋云。定生先生爲復社領袖。縞紵滿天下。兵燹之後。零落殆盡。恨別感時。驚心濺淚。此錄之作。何能已已也。繚繞哀音。聲聲入破。山陽暮笛。感頑艷而淒心脾。人言愁我亦欲愁矣。癸卯孟夏。松陵楊復吉識。先君子書云。予友吳江楊慧樓進士。喜國朝名家小品。嘗錄得數百種。名曰續昭代叢書。予家秋園雜佩。皆從之借鈔者也。

秋園雜佩

此卽從楊氏借鈔者。有侯方域序。子宗石跋語。慧樓進士手書跋云。是亦易安金石錄序。遣山故物譜之類也。使仰今昔。靈然傷懷。佩繽紛以繚轉兮。遂萎絕離異。物猶如此。人何以堪。未免有情。誰能遣此。癸卯孟夏。松陵楊復吉識。

善權古今文錄

右鈔本十卷。寺僧方策纂。有王濟之。文衡山二序。李瀛。蔣允岳跋。先君子書後。已刻愚谷文存中。

楊忠愍公手札

右錄忠愍與鄭端簡書題跋一卷。先君子跋。已刊愚谷文存。此册各有按語。又書後云。案忠愍公以嘉靖三十一年壬子秋。陞南戶部主事。未之任。是冬。卽調兵部武選司。十二月十八日到任。明年癸丑元旦。日有食之。公欲因此上書。直陳時政。故曰一路日食。奏稿成也。日食次日。乃癸丑正月初二日。攷明史世宗

紀癸丑正月朔。獨不言日食。殆是日適逢陰晦。彼君臣方欲諱災。反以內靈臺爲妄。故有擊打之事。公見題目不合。遂趨出。別艸疏稿。卽於是月十八日奏上。此皆與年譜符合。無可置疑。其所謂南都事。當卽興學校。開荒田。緝武備。繕城池等。皆公平日之欲爲而未得者。年譜言之悉矣。二王事。亦不過言父子不宜疎遠之意。蓋是時世宗尤多嫌疑。稍涉建儲事。便曰欲死時君。立新君。立置重辟矣。公豈見不及此乎。至末云湖翁欲老先生還朝。湖翁當卽徐少湖。按端簡本傳。以南太常召爲吏部郎。歷階刑部尙書。皆如公所言也。偶觀諸公所題。多有異同者。聊復識之。嘉慶戊午中元日。某再跋于竹下書堂。

顧令君政績卷

右題跋歌詠一冊。皆爲令君禱雨。陳山龍君行祠而作。張文漁徵士見此卷墨蹟錄出。而先君子手書。並有按語跋文。已見愚谷文存。此冊末附許雲邨給諫顧令君頌一篇。頌爲先君子所收藏。後以贈文漁徵君。詳見文存跋語中。

許淮陽食史

食史一卷。許稚則先生著。前自序。題崇禎辛未賣錫天。兩垞老饕書。先君子校。並有按語。

小名補錄

舊鈔本小名補錄。後附名花異木記。同邑陳香泉先生著。先君子書後云。此編所收。多有與南宋陳思小字錄。及明沈宏正小字錄補相同者。先君子又輯香泉論書偶記附後。

敬修堂同學諸子出處記

右鈔本一册。原有硃筆點次。先君照錄。並校正。

渡海輿記袖海編

鈔本渡海輿記。不著撰人名氏。有雍正十年知將樂縣事蜀周于仁序。袖海編。汪鵬撰。有乾隆甲申鵬自作序。二種合爲一册。先君子手校。並記後云。乾隆辛丑十月廿七日。校於秦溪舟次。時與室人同送外氏葬還。經烏夜邨小泊志。

一隅錄

錢塘周澍著。先君子手寫本。蓋澍客臨汀時所記也。自序謂臨汀八閩一隅。故以名編。又云。疇曩旅食金閩。則有姑蘇記事詩二卷。都下。則有帝京篇四卷。涿鹿與李中貴交。則有溫樹錄一卷。今皆未見。予家所收者。尙有臺陽百咏鈔本。先君子曾采其茗壺詩。入陽羨名陶錄。

竹垞初白二先生尺牘

竹垞初白二先生尺牘手跡。並爲武原涉園主人所藏。蓋皆與寒中上舍者。乾隆甲寅春。先子假歸。彙錄一册。題竹垞尺牘後云。予以甲寅暮春之初。與諸名士修禊于海鹽城南張氏之涉園。主人雅好事。又與予有連。是日。余以所藏楊忠愍公獄中寄鄭端簡手書真蹟。歸端簡後人。羹和茂才。卽席同人皆賦詩紀事。留連竟日。頗極文酒之樂。鷗舫旋出。此册見跡。蓋皆竹垞檢討晚年手畢也。因借歸細閱之。書凡六

十通。其間與馬寒中上舍者什九。寒中爲吾邑藏書家。插架多人。閒未見本。故書中大抵皆論典籍事。或展轉傳鈔。或多方購買。於此想見前輩好學之勤。嗜書之篤。誠可慕也。至其中論耿炳文沒于洪武二十七年。而紀傳謂建文命炳文率師禦燕。由實錄爲西楊改削。文獻無徵。此書足正史傳之失。又豈尋常簡札酬應之比哉。因亟錄副。而以原本還鷗舫。俾珍弄之。鷗舫爲大白先生來孫。累世清秘之藏。彷彿插花山。斯蓋其一斑云。是歲競渡日。兔牀吳某識。又書初白菴尺牘後云。右初白先生尺牘。蓋皆與寒中上舍者。其真迹並涉園主人所藏也。某又記。惜鈔本尙有譌字。須再校正爲善。倘得好古者梓而行之。俾前輩嘉言懿行。時時在人耳目。所裨豈淺鮮哉。

元珠密語

元珠密語。唐王猷著。影宋寫本。每葉十六行。行十六字。前有自序。後滬城成孚氏跋云。元密一書。除宋版外。更無二刻。又其書微渺難測。世醫亦不欲深究其理。是以所傳不甚廣。迄今日已成絕無而僅有矣。余購之廿年。卽鈔本未獲一遇。歲乙亥。偶於茸城張氏。得見宋刻本。一時驚喜。如覩至寶。詢之。云以重價購得。余懇借再四。始獲攜歸。卽命諸子弟力疾鈔之。近聞張氏本已充進御物矣。余獲借鈔。不勝幸甚。爰識其始末如此。後人其世守之勿替。滬城成孚氏識。下有潤挺之印。莘畊二圖記。先君子書云。元珠密語十六卷。不見于新舊唐書藝文志。及文獻通考。惟晁氏讀書志有天元玉冊三十卷。云啓元子撰。啓元子卽唐王猷也。書推五運六氣之變。今此只十六卷。未知與天元玉冊相同否。夾深通志。元珠密語十卷。不

著撰人焦氏經籍志同。讀書敏求記。元珠密語十七卷。七或六之譌。吁江張三錫運氣格。以爲託名元珠密語。予按其序云。余于百年閒不逢志求之士。遂書五本。藏之五嶽深洞中。遇者可以珍重之。寶愛之。勿妄傳之。見之天生。可以延年。見之天殺。可以逃殺。傳之非人。殃墮九祖。其言多詭誕不經。吁江之言。當非謬也。嘉慶甲子四月。兔床志。簡莊徵君得吳中袁氏鈔本。復爲互勘一過。書云。唐啓元子元珠密語。按啓元子卽王礪也。礪註內經序云。辭理秘密。難粗論述者。別讓元珠以陳其道。宋高保衡等新校正云。詳王氏元珠。世無傳者。今有元珠十卷。昭明隱旨三卷。蓋後人附託之文。雖非王氏之書。亦於素問第十九卷至二十四卷頗有發明。其隱旨三卷。與今所謂天元玉冊者。正相表裏。而與王礪之義多不同。是唐時實有元珠一書。而宋時所傳者。疑爲附託。但自宋以來。流傳甚少耳。余得吳中袁氏鈔本十七卷。與讀書敏求記合。此本爲吳氏拜經樓舊藏。後有成孚氏跋。知從宋版傳鈔。惟止十六卷。今以余所得本校之。則十一十二兩卷并而爲一。又五行類應紀篇。脫落數番。彼此互勘。庶得完善矣。嘉慶十五年除夕。淳海陳鱣記。嗚按。此書自序云。今則直言編紀一十六卷。目錄亦十六卷。恐分併有所竄易耳。

宣明論方

宣明論方七卷。每葉二十八行。行二十五字。有大定十二年守真自序。大定己亥古唐馬□□序。紙墨古雅。當是明以前刻本。首列分門科類。總一十八門。次列諸葉炮熅炙燂例。先君子書河閒三書前云。河閒宣明論方。原刻七卷。後人翻刻。妄分爲十五卷。而行款亦多改換。余家舊本。有大定己亥古唐馬□□序。

賜按四庫目錄亦十五卷云。大旨本素問及金匱要略。而用藥多主寒涼。蓋因北方地氣而施。泥之者非。廢之者亦非也。自序稱三卷。此本乃十五卷。其方下小序有稱灌頂王子所傳者。金時安有是名。知傳刻有所竄入也。其作十五卷。蓋亦據近時刻本。且按守真自序云。僕今詳內經。編集運氣要妙之說。七萬餘言。九篇分爲三卷。謹成一部。目之曰內經運氣要旨論。備聖經之用也。對病論證。處方之法。本草性味。猶恐後學難爲驅用。復宗長沙太守仲景之書。迺爲一帙。計十萬餘言。目曰素問藥證精要宣明論方云云。是三卷者。乃內經運氣要旨論。非此書也。此本前題校正素問精要宣明論方。蓋亦經後人點勘矣。

本草衍義

本草衍義二十卷。每葉二十四行。行二十一字。首行題本草衍義卷之一。次題通直郎添差充收買藥材所辨驗藥材寇宗奭編輯。首張缺前半頁。後半頁第一行。聖旨。寇宗奭特與轉壹官依條施行。添差充收買藥材所辨驗藥材。二行。右割付寇宗奭。三行。政和六年十二月二十八日。五行。宣和元年。月本宅鏤版印造。六行。姪宣教郎知解州解縣丞寇約校勘。紙墨古雅。有汪文柏柯庭。休甯汪季青家藏書籍圖記。面頁題摘藻堂藏。

經歷奇證

經歷奇證不分卷。明錢唐錢君穎著。先君子從道古堂借錄。識後云。錢君穎在勝國時。以醫鳴。是編病原治法。多常人耳目所未及者。惜流傳不廣。昔年見舊刊於堇浦先生案頭。因從之借鈔。以備活人之一種。

云。乾隆丁酉九秋。兔牀記。

心印紺珠經

右二卷。明刻本。前有江州陳守義序。嘉靖己酉歸德府儒學教授浙東葉良玉書後。先君子書云。按千頃堂書目。心印紺珠經二卷。元朱搆作。字好謙。傳醫學于李湯卿。劉河間弟子。

治法彙

右七卷。舊人批本。先君子題云。岐黃之書。惟盱江之說。最醇正無弊。相傳評點者。爲石門某氏。昔二愚兄有之。後遊廣陵。歸失去。常以爲憾。嘉慶癸亥夏五月。予復購得此本。雖非石門親筆。亦有心濟世者之所當留意歟。竹醉後二日。三歸亭長識。又云。二愚兄有舊時從養餘齋過錄治法彙一部。因假而校對。則二愚本評點。多漏略不全。大約僅什之二三而已。其間有此本所無者。以墨筆補之。其下有稱琦記者。二愚謂卽誠庵公。未審是否。當更攷之。某又識。

已任編

右八卷。內墨筆朱筆藍筆三種評點。卷首眉閒書云。乙亥十月偶評。與丁卯庚午批點微別。四卷以後。係幼時筆記。有東臯艸堂圖記。

痘疹仁端錄

右鈔本六卷。明欽李徐謙仲光著。先君補鈔首序二篇。並記首簡云。按簡明書目。仁端錄十六卷。十字疑

衍明徐謙著其門人陳葵刪定今此本六卷視近時坊刻五卷者不翅倍蓰究不知陳葵定本何如恐未必如此本之詳也兔牀記

葬書

右葬書草廬先生所定分內外雜三篇首有目錄目後序云右葬書相傳以爲晉郭璞景純之作內外八篇凡一千二百四十六字世俗所行有二十篇皆後人增以謬妄之說建安蔡季通去其十二而存其八亦既得之就其所存猶不無顛倒混淆之失此本爲最善篇分內外蓋有微意雜篇二俗本散在正書篇中或術家秘畜故亂之也此別爲篇倫類精矣覽者詳焉臨川山人吳澂識前題地理葬書集註草廬先生吳文正澂刪定後學金華元默生鄭謚注釋後附葬書問對不著名氏有趙子常跋云吾友程君仲本最爲留意斯事故書以遺之仲本之師朱君允升其人也云云末題至正十三年十月既望趙汾子常書于東山精舍是本紙墨精雅古香可愛先君子嘗以示黃堯圃主事並別錄宋濂序一紙于後書云吾舊藏元版葬書黃堯圃云的屬元刻渠家亦有一部與此本同讀書敏求記所載卽此本此宋潛溪序乃明初刻有元本未有也則未有宋序者不更可寶歟

靈棋經

靈棋經一册不分卷無撰人名氏有唐會昌九年尙書司門員外李遠敘書中題晉魏都郎中顏幼明註宋御史中丞何承天註元廬山叔才陳師凱解大明誠意伯劉伯溫解每卦象下皆繫以顏曰何曰陳曰

劉曰等解。先君子手書通志一條。靈棋經一卷。張良傳撰。又一卷。唐李暹撰。齊江謐占得送貨卦。見南史卅六。御覽七百廿六。又書南臆紀談一則于別紙云。傅崧卿以冰餽同舍。其東詞云。蓬萊道山。羣仙所遊。清異人境。不風自涼。火雲騰空。莫之能口。餉以冰雪。是謂附益。讀者莫解。或曰此靈棋也。又董含三岡識略云。靈棋經。不知造於何人。前列唐人一序云。漢留侯受之黃石公。用梓木製棋十二。刻上中下各四。擲成卦。每歲人日以酒果祭之。考書披詞吉凶得失。莫不奇應。予虔奉二十餘年。叩以事十驗。八九勝于市。塵卜肆多矣。前列造靈棋法。占儀。祭儀。祝文。乾隆壬子十二月十一日。先君子曾以下萬蒼山墓地。得大通卦。

景祐遁甲符應經

遁甲符應經。讀書敏求記作三卷。此寥寥數十番。不分卷。未知是全書否。有永樂十三年御製後序。末爲遁甲大全集。有出行圖。十二神圖。鈔本有祝眉老印。

圖繪寶鑑

右五卷。元刻本。每葉二十二行。行二十字。先君子跋。刻愚谷文存。吳中黃蕘圃主事跋云。夏文彥圖繪寶鑑五卷。載於讀書敏求記者。爲得其真。他如津逮所刻。已合明欽天監玉泉韓昂續纂者。而并爲六卷。又何論近刻之八卷者乎。余所收論畫諸書。如畫評。圖畫見聞志。宣和畫譜。廣川畫跋。畫繼。畫鑒等。皆有舊刻名鈔。惟此獨無善本。今觀此刻。歎爲希有。蓋書必求其初刻。如此刻雖漫漶不可卒讀。然五卷原書。

具在。後附補遺。與他本附補遺於六卷後者。面目已改。豈不可寶。且收藏爲廬江王。猶是幾百年前故物。拜經樓主人以爲裝潢極精。非民間藏書。吾嘗見成化時閣本。大唐開元占經。每冊俱用黃綾作簿面。復用黃絹作籤條。此可見官書鄭重。卽裝潢可辨。與此可互證也。士良搜羅畫人姓氏。可謂極詳。然吾有疑焉。嘉熙時有宋伯仁梅花喜神譜二卷。潛溪先生詳畫梅之原。五代有滕勝華。宋有趙士雷。邱慶餘。徐熙。仲仁師。楊補之。今寶鑑所列。一一不爽。獨遺伯仁一人。則士良之書。殆有未盡耶。聊記於此。以備考。壬戌仲秋。二十有七日。海甯陳簡莊。攜此本示余。云是吳君兔床所儲。屬余題識。越五日。爲九月二日。聽雨士禮居中。繙閱一過。古香襲人。殊破岑寂。爰跋數語而歸之。吳縣蕘圃黃丕烈識。簡莊徵君跋云。圖繪寶鑑五卷。元吳興夏文彥撰。是本雖墨色漫壞。然猶是元版而明印者。遠勝今本之竄亂混淆矣。卷首抱遺老人敘。艸書極佳。蓋係鐵匡手書付梓。敘稱雲間義門夏氏。則文彥又爲雲間人。是書每冊有廬江王圖記。王藏書甚富。就余所見。凡數種。皆善本云。陳鱣記。

畫徵錄

增訂畫徵錄三卷。後附圖畫精意識。先君子親筆評點。並補畫家數人。

宋本百川學海

舊刻本五十八種。內重中華古今注。試筆二種。有休甯汪季青家藏書籍圖記。先君子書目錄於別紙。並記云。此書各種說部。疑是百川學海。計五十八種。內重二種。也是園書目。百川學海一百三十四卷。又以

墨筆標識四十六種。云上有點者。蘭竹山房本所有。與予所藏同一板口。又書開天傳信記目下云。萬回事。惟此獨詳。其中翰林志一卷。先君子手校。並書六典中書一條上云。行者下少。則用之三字。宋本亦少此三字。鮑以文校翰苑羣書云。然則此宋本也。

拜經樓藏書題跋記卷五

陰晉陵集

右陰子堅集一冊。詩三十二首。後附錄詩話。先君子從抱經堂借舊鈔錄藏。記首頁云。陰晉陵集。爲周苞今大令手輯。其後予從盧紹弓學士借得一舊鈔本。不知何人所集。視周本多詩數首。因錄其副。以補毛氏百三名家刻之所未備。附錄詩話。乃周所輯。

集千家注杜詩

右二十五卷。前題東萊徐居仁編次。臨川黃鶴補注。後記皇慶壬子余志安刊于勤有堂。首列集注姓氏。自昌黎韓氏迄盧陵劉氏辰翁。按四庫書目二十卷。元高楚芳編。竝云本南宋書肆所刊。楚芳略爲刊削。而以劉辰翁評語散附句下。已非其舊。此本多五卷。未知視楚芳本何如。至楮墨精雅。不減宋刻。每葉二十四行。每行大字二十。小字二十六。有雪莊張氏鑒藏圖記。與向藏周禮重言重意所鈐用者同。蓋精於賞鑒者也。

杜律五言注解

杜五言律三卷。元趙汭注。吾族商山家塾刻本。卷末一行云。戊子春日之吉。休邑商山吳氏七松居家藏板。下有吳懷保印。四皓居二圖記。

韓文考異

右二十卷。元刻本。每葉二十六行。每行大字二十。小字夾行二十。首序無撰人姓氏。次爲寶慶三年王伯大序。又次諸家姓氏。又次李漢序。汪季路書。及凡例。先君子書夾簽云。按書錄解題。載韓文考異四十卷。外集十卷。今此本文集止二十卷。外集不分卷數。不知何故。又簽云。查氏得樹樓本。外集別刻目錄。潮州謝孔大夫狀。後尙有疏一首。憲宗崩。慰諸道。題名七首。然查本刻法亦有誤。題下注在後一行。字畫校此本端整。宋諱如廟諱慎字敦字。皆不缺筆。蓋亦元刻也。又簽云。按此當卽留耕王氏原刻。所謂南劍本也。第余攷秀水王惺齋讀韓記疑云。王伯大本。每卷末附音釋若干條。而此未見。其音釋惟散入注中。諱舛亦甚多。又豈後人翻王本歟。

又

明刻韓文考異四十一卷。朱崇沐本。卷首無宋喜公一條。墨筆補。內有丹黃評點。又卷中補注各條。細書於上下眉。頗徵用力之勤。惜不著其名氏。前後有秀水朱氏潛采堂圖書。及查初白印二圖記。蓋曾經竹垞他山二先生寓目者。先君子書云。秀水王元啓讀韓記疑云。明新安朱崇沐刻。是書脫誤甚多。因其行世最廣。故據此詳校。俾讀者考焉。據王說。是此本誠未爲善本。暇日當更以王記覆校之。

笠澤叢書

右鈔本七卷。補遺一卷。先君子校定爲蜀本。題辭見愚谷文存中。仁和趙寬夫跋後云。笠澤叢書。舊刻

本不傳久矣。近時有吳門顧氏新雕本，字畫精好，然諦審之，謬疊見。海寧吳槎客先生初借吾鄉郁氏本以勘新雕本，復校以拜經樓自藏本及林厂山本、海鹽吾以方本、秀水蔣春雨本，凡五校，初用硃筆，次綠，次藍，次墨，末復用硃，而以蔣本二字別之。又以文苑英華、唐文粹參校，用黃色筆及硃筆，合諸前五校爲七。先生於是書可謂勤且密矣。郁氏本、拜經樓本、林氏本、蔣氏本，皆舊鈔，吾氏本則陸鍾輝所刊，吾氏據宋本校正者也。郁氏有元人王益祥跋，卽都元敬據以付刊者，然無元敬跋，則或鈔自元刻，無謬誤，可依據。其篇次不與顧氏新雕本合，如紀錦裙在丙集首，迎潮送潮辭在丁集首，憶白菊及閒吟二詩，缺。憶白菊詩在丙集末，求志賦下接問吳宮辭，王益祥跋在陸惠原跋前，拜經樓本分七卷，補遺一卷，直齋書錄解題，蜀本十七卷，蜀人樊開所刊，文獻通考云七卷，十當爲衍字，則七卷爲蜀本無疑矣。特補遺一卷，未知何時編入，或書錄解題及通攷不數補遺耳。前列魯望自序，無樊序，殆佚去。案魯望自序云：不類不次，混而載之，得稱爲叢書，則分甲乙丙丁者，陸氏原書式也。以詩文分類，析爲七卷者，樊開所編也。特字句較各本殊勝。林氏本者，後有阮林跋，云得龔衡圃鈔本校，然不知出自宋元人何本，無勝處，不可信。吾氏本訂譌僅數處，想多與郁本合。蔣本分上下二卷，篇次與新雕本同，惟少耒耜經一篇，字句無謬，足爲郁本之佐證。若顧氏新雕本，先生以爲似從黃俞邨本出，卽王貽上初得本也。其中紀錦裙，蜀本作記錦裙，先生證以吳融詩，謂作裾者是。送豆盧處士謁宋丞相序，先生以丞相爲豆盧瑑，有宋字者，謬皆確不可易。坦旣借得校本，手自繕寫，浹辰始畢，爰述其校勘次第，各本優劣，以質諸先生，且以志嘉惠云。嘉

慶十六年十月廿一日書

又

右蜀本即從舊本錄出。後復從宋本附錄補遺一卷。每葉二十四行。行二十一字。視各本多送小雞山樵人序。漢三高士贊。小雪後書事。小名錄序諸篇。先君子記云。此卷行款字數。悉照宋本。

又

右中吳顧氏刻本。先君子從諸本校。凡五次。並補錄小名錄序。王益祥跋。陸鍾輝跋。及明王良棟。康熙丁卯襲蘅圃。阮善長諸題識。其始末具詳。愚谷文存跋中。此本記云。甲午秋日。借錢唐郁陞宣東獻軒舊鈔本校。用硃筆。復用拜經樓藏本校。用綠筆。乙未二月。以文又購得林厂山先生鈔本。用藍筆校。丙申秋仲。復從海鹽吾太學以方借其照宋本校。正陸氏刊本。用墨筆。并補錄小名錄序及跋。辛丑九月。又借得秀水蔣君春爾舊鈔本校。勘仍用硃筆。蔣本惟分上下二卷。無目錄。前列樊開序及自序。卷末附陸龜蒙傳。朱亥後序。德原跋。蔣本前後篇數。與刻本同。唯少耒耜經一篇。復經周松靄大令。吾竹房太學校。大令記云。乙未正月初四日校起。初九日畢。其確無疑義者。用圈。顯然謬誤者。用擲。至字可兩通者。用點於傍。但心緒苦劣。匆匆或有未盡處。况風庭掃葉。此事本難。免牀其再勘之。松靄棘人周春記。吾竹房太學書云。戊戌首春。免牀先生以此書屬余校勘。勘法一遵松靄先生之例。其是正處。朱黃二毫為勝。然蹲鴟雞尸。自昔為然。免牀其值本即校。勿以再三為限可也。竹素後人吾進識。先君子又書紀錦裙篇後云。吳

融集有古錦裾六韻。自注云。錦上有鸚鵡。鶴。陸處士有序。此是錦裾而非錦裙。明矣。按鮑鈺道腴堂集云。甫里集亦作記錦裾。又書云。按詳記錦裾文。前言瓦官寺有天后羅裙。佛旛皆組繡。明是裙與旛爲二物。復云。李君乃出古錦裾一幅。眎余云云。似李君所藏衣裾。與瓦官之天后羅裙無涉。詳其制。殆如今之霞帔。故上狹而下廣。前有鶴。而背有鸚鵡。的係子華所賦者無疑。陸記又云。縱非齊梁物。亦不下三百年矣。又曰。曳其裾者誰歟。其爲非天后羅裙。益可見。然其詩落句。有武威應認得之語。不知其所指。豈子華當日讀此記不審。而亦認爲天后物耶。書此俟攷古者更詳之。嘉慶辛未除夕。又攷梁元帝詩云。願織回文錦。因君寄武威。融詩用武威。當出此。非指則天也。又記。張文漁徵君書云。笠澤叢書。余向有碧筠草堂刊本。好友陸白齋。又贈何義門先生校本。自喜所藏稱善矣。今假兔牀先生所校。集諸家之大成。較何本訂正更多。按碧筠本爲吳人王岐所書。筆訛尤多。先生一一改正。以說文爲宗。且有益於小學。不僅爲甫里功臣也。又紀錦裙一首。先生校正是裾字。非裙字。引吳融集古錦裾六韻。自注云。上有鸚鵡。鶴。陸處士有序爲證。皆刊本所沿訛者。先生精心校之。後之求叢書者。不得朱袞。樊開本。當以先生本爲甲觀矣。乾隆乙巳七月十九日。海鹽張燕昌識於冰玉堂。黃蕘圃主事書云。紀錦裙一首。兔牀先生引吳融詩爲證。可破羣疑矣。余謂裾與裙雖各本不同。而篇中曳其裾者。裾字本不誤。且曳裙未見所出。斷非裾或爲裙之誤也。承兔牀借讀。附著於此。嘉慶乙丑四月十有九日。蕘翁黃丕烈識。

又

右陸氏刻本。先君子從慈谿畢氏所藏。何義門先生校本。烏程嚴氏所藏。何仲子校本。勘對並錄。義門跋云。此册丙寅歲。大人從江右雜書中攜歸。以其脫誤難讀。久置敝篋中。己丑秋。適從虞山錢氏借得。馮己蒼所傳元板佳本。因取而改竄。以示後人。使知鈔本之不足據。如此若能細寫一淨本。便自可讀。亦不負吾區區讎比之意也。焯記。又此書別有編爲八卷者。以自序冠之。則此四卷者。乃舊次八卷分雜著與詩而二之。便非不類不比矣。或謂八卷乃宋刻。殆耳學也。焯又記。仲子跋云。借華山馬塞中所藏宏正中鈔本校。鈔本雖未經校勘。訛誤觸目。詳其所自。卻從宋本胥錄。究爲善本。觀者幸不以訛誤而忽諸。康熙戊戌秋。又八月之一日。仲子記。先君子書後云。乾隆丁酉夏日。鮑君以文爲借得慈谿畢氏所藏。何義門先生校本。因傳錄於此。叢書舛譌至多。予廣求善本。讎比至此。凡七本矣。常欲別刊一本。以正江都吳下二刻之失。未知何時得遂。斯願也。甲寅夏日。烏程嚴久能茂才。又以所藏何仲子小山手校本見借。因復校一過。又記。義門先生跋後云。畢本後附宋刻叢書八卷目錄。與予舊藏鈔本略同。故不錄。兔牀記。又書紀錦裙曳裾二句下云。按吳融有古錦裾六韻。自注云云。而蜀本笠澤叢書亦作記錦裾。似魯望所記者。乃錦裾而非錦裙。然文苑英華亦作記錦裙。蓋仍訛已久矣。觀此二句。則斷非裾。亦與瓦官無涉。疑瓦官者。乃武后之羅裙。而魯望所記。與吳融所詠者。是李侍御所藏之古錦裾。不得混而爲一也。又書卷首云。陳直齋云。叢書爲甲乙丙丁者。詩文雜記。政和中朱袞刊之。吳江末有賦。用蜀本增入。蜀本七卷。鄂人樊開所序。據陳氏之說。是蜀本刊在朱袞前矣。自元符庚辰至政和辛卯。凡十二年。予舊有鈔本七

卷笠澤叢書以諸本會勘之。定爲蜀本。倘能刊之。當遠勝此本矣。

又

右亦陸氏刻本。前有甫里先生像。馮君補亭所贈。先君子記云。嘉慶乙丑秋日。馮爾修茂才以此本見寄。時爾修已薨三載矣。

張承吉集

右唐張祐承吉撰。舊鈔本。首題張處士詩集。凡六卷。無序目。按晁志作一卷。

黃御史集

右曹氏刻本。八卷。末爲附錄。前有洪邁、楊萬里、謝堦三序。及曹學佺重刻序。四庫書目作十卷。附錄一卷。云原集久佚。此本乃宋淳熙中。其後人所重編。今此爲八卷。未知視閣本何如。首有敬亭山人家本濇溪二圖記。

禪宗永嘉集

永嘉集。唐僧元覺撰。慶州刺史魏靖輯。宋石壁僧行靖注。凡二卷。首有楊億所撰無相大師行狀。

讒書

讒書五卷。先君子從蕘圃先生借本校刊。跋見愚谷文存。又鈔本一卷。至四卷。蕘翁錄寄。有題語。

碧雲集

右李中撰卷分上下。首有孟賓于序。舊鈔本先君子以琴川毛氏、東山席氏二家刊本校。硃筆記歲月於後。跋云：李有中，南唐時爲新淦令。嘗與張洎、韓熙載、潘佑、徐鉉諸人相友善。故多投贈之什。所著碧雲集。水部郎中孟賓于爲之序。尾題癸酉者。蓋宋開寶之六年也。序中摘錄秀句。方之方干、賈島。良不爲過。然余讀餘篇。見其眷懷邦國。如有隱憂者。正復不少。則又杜牧、羅隱之儔矣。惜當日舉國風靡。淪胥罔顧。屈指曹彬南下之歲。距賓于序集之秋。寒暑僅再周耳。虞之不臘。明者已早燭其必然。孰謂握三寸不律。而仰屋梁者。遂不曉事耶。是集按晁氏讀書志及文獻通攷所引。並云二卷。惟曝書亭藏書目作三卷。予此本得之烏夜村張氏。卷數適與之相符。何古今本之不同也。又序言五六七言二百篇。而此實三百餘篇。豈後人附益而重編之歟。書此以俟。它日考定云。乾隆甲午立秋日。兔牀吳某識。

河東集

河東先生集十五卷。舊鈔本有附錄。四庫書目作十卷。附錄一卷。按景序明言十五卷。近慈谿柳氏有重刻本。抱經先生、竹汀先生並爲之序。均未詳卷數。未審視此本何如。當更訪之。先君子書鐵園山叢談。江南徐鉉歸朝後一則於前云。據此則仲塗文章。雖擅一時。而人品不無可議。張景行狀謂不拘小謹。蓋其微詞。而陳直齋亦云。開爲人。史稱其傲很剛愎。合觀數語。則開先時自名曰肩愈者。不亦妄乎。戊戌春日。偶從武林得舊鈔本。漫題首簡。

穆河南集

右舊鈔本。穆修伯長著。三卷。附錄遺事。有劉清之跋。有呂氏藏書。恥齋二圖記。

古靈集

古靈先生集二十五卷。宋刻本。每卷前有子目。末有使遼語錄一卷。乃諸本所無者。詳先君子愚谷文存跋語中。每葉二十行。每行十八字。雖間有闕翻及文字漫漶處。然紙墨精雅。古香氤氳。誠宋本之甲也。己卯夏。錢唐何夢華少府過談。云新得舊本古靈先生使遼語錄一種。未知卽集中之本否。擬借校。尙未果也。

又

鈔本古靈集二冊。乃曹氏古林書屋藏本。有曹溶私印。深躬二圖記。無闕葉。有闕字。較宋刻多本傳及年譜二篇。先君子以宋本及小艸齋藏本校。記後云。乾隆甲寅長夏。以所藏宋刻本校。離一過。宋本乃鮑綠飲歸余。二本互有存佚。鈔本與謝在杭藏本相同。刻本多使遼語錄一篇。尤世所希觀也。是歲秋七月記。

宛陵集

宛陵集六十卷。吳樵石先生評本。書卷首云。宛陵先生謂作詩須寫難言之景。如在目前。含不盡之意。見于言外。今讀其集。方知此語實先生自道所得也。敬業師曾語余。宛陵正是突過塵語。又云。宛陵仍是唐音。非宋調也。阮亭詩話作詩曰典。曰遠。曰諧。典諧易得。遠字惟韋蘇州及宛陵到之。先君子記云。右跋當爲吳樵石先生筆。樵石名嗣廣。字芭君。邑諸生。嘗以詩受知於初白先生。故稱敬業師。壬申秋日記。

又書後云。宛陵集爲吳樵石先生評點。樵石名嗣廣。字芭君。樵石其號。海甯硤石人。工詩。與錢坤一。汪匡古諸君往還唱和。身後遺書多散佚。予嘗從其孫曉亭見樵石詩稿若干卷。今曉亭沒久矣。不知此稿尙存其家否。余藏弄宛陵集亦幾五十年矣。嘉慶壬申七月。八十老人吳某記於小桐溪之拜經樓。

嘉祐集

嘉祐集十四卷。四庫書目作十六卷。云洵集在宋凡四本。曾鞏作洵墓志。稱二十卷。晁氏陳氏著錄。皆十五卷。徐氏傳是樓紹興十七年婺州槧本作十五卷。附錄二卷。又有邵仁泓翻雕宋本。與徐本小有異同。亦十六卷。今所傳者有兩本。一爲凌濛初朱墨板本十三卷。又有蔡士英刻本十五卷。曾鞏所誌。與晁陳所錄。今不可見。以所存四本相較。當以徐氏宋本爲近古。今用以著錄。而以邵氏宋本互核焉。是本卷數與諸家悉不合。紙墨頗舊。惟無序及刊刻歲月。未能定爲何本耳。

王梅溪集百家注東坡先生詩集

宋刻王梅溪集注分類東坡先生詩集。每葉二十行。每行大字十九。小字夾註二十五。前有建安萬卷堂刊梓於家塾長墨印。卷首有慶元路提學副使矚理書籍關防鈐記。及濮陽李廷相雙檜堂書畫私印圖記。先君子跋。見愚谷文存續編。此本夾籤云。續文獻通考。元時儒學提舉副司管祭祀諸職。兼送到典帙。按李廷相。錦衣衛籍。濮州人。宏治壬戌進士。累官戶部尙書兼太子賓客。贈太子太保。諡文敏。有南銓稿二卷。聯句一卷。見千頃堂書目。又書別紙云。王梅溪分類蘇詩注二十五卷。不及和陶詩。迨施元之編年。

注始合刊之。按苕溪漁隱叢話云：前集乃東坡手自編定，後集乃後人所編。惜乎不載和陶詩，然則當時人刊東坡詩，多不及和陶詩，無足怪也。按馮星實刻文忠詩合注，凡例所見元刊本王梅谿百家注，或云末卷和陶，余未之見，此亦傳聞未確也。庚溪詩話：崇甯大觀間，蔡京當國，禁蘇軾文詞墨跡而毀之。政和間，忽弛其禁，光堯太上皇朝，盡復軾官職。今上尤愛其文章，乾道初，梁叔子任掖垣兼講席，一日宿直，召對上曰：近有趙夔等注軾詩甚詳，卿見之否？命內侍取以示之。乾道末，上遂爲軾御製序贊，冠其文集，命有司與詩集同刊之。先君子長歌一首，見拜經樓詩集。此本後附錄，並記云：宋王梅溪集百家注東坡詩，近所行本皆後人妄行竄亂，芟併全失本真。與宋商邱所刊施注蘇詩無異。觀者每以不能一見宋刻爲恨。今夏有苕賈持此書抵余家求售，適余他出，不值而去。明日余歸，操舟訪之，始得諸硤石南湖中。遂以善直購焉。此書楮墨精雅，古香襲人，真舊本之最佳者。爰爲長歌以書其後。當乾隆五十一年夏重午後二日，兔牀吳某識。男壽陽書。又夾簽云：吾友鮑君以文嘗疑百家姓氏中胡銓字邦衡爲後人妄添。謂胡銓姓名偶同，而實非忠簡公。予竊以爲不然。按注中明有引邦衡曰者，則其爲忠簡無疑。鮑君又謂忠簡廬陵人，不應冠以苕溪。予按書中只以苕溪冠胡仔姓氏上，而胡銓上偶失著廬陵耳。如潘大臨、大觀皆黃岡人，而列豫章之後；徐俯、臨川人，而列臨安之後。此並注家之鹵莽也。

又

右蘇詩王注三十二卷，末二卷爲和陶詩。何義門先生評本，每卷皆題記歲月，卷末記云：蘇詩僅三十二

卷閱之而月始畢。讀書如此作輟。雖慧者難望有成。況愚鈍如予者乎。放筆爲之惘然。癸酉九月鈔摘坡公佳句五日而畢。漫記書尾。此本先君子從知不足齋借臨。書後云。乾隆乙未以文購得王注蘇詩。及唐音戊籤。並何義門太史評本。凡去價十千。蘇詩是陳少章先生臨本。因從之假歸。倩朱君允達錄于此本。戊籤別自臨之。時丙申夏五吳某記。內三十一卷中間淵明一首。宋本在第一卷。非和陶詩也。先君子特爲拈出。

蘇詩補注

蘇詩補注五十卷。查初白先生手稿。桐鄉汪氏藏本。面頁題初白翁原稿。擁書樓收藏。並有梧桐鄉汪氏擁書樓所藏圖記。卷首自序云。補注之役。權輿於癸丑。迨己未庚申。後往還黔楚。每以一編自隨。己卯冬渡淮北上。冰觸舟裂。從沙泥中檢得殘本。淹汜破爛。重加綴葺。辛巳夏。自都南還。夜泊吳門。遇盜探囊。胠篋之餘。此書獨無恙也。自念頭童齒豁。半生著述。不登作者之堂。庶幾託公詩以傳後。因閉門戩影。畢力于斯。追惟始事迄今。蓋三十年矣。雖蠡測管窺。何足仰佐萬一。顧視世之閉局於五月。歲事於臘月。半年勒限。艸促成書。淺深得失。必有能辨之者。康熙壬午仲春。初白菴主人查慎行識。先君子記後云。右爲初白先生手定注稿。視嘉善刻本。多有異同。嘉慶己巳試燈日。老友鮑綠飲自梧桐鄉過訪。謂有初白注蘇詩手藁。予出此際之。相對恍然。蓋先生注此書。數易其藁始成。具見良工之苦心也。庚午夏日。鄉後學吳某跋于西簾之小縹雲軒。時年七十又八。又云。桐鄉馮星實補注蘇詩。屬其戚項根堂從予借宋刻王

狀元注蘇詩不意爲中閣故馮刻所引王注亦多不全未免遺憾翌日槎客又記

樂城集

鈔本前集五十卷插花山馬氏藏本首頁有玉音孝友著於家庭信誼隆於鄉黨朱文印卷內有古鹽官州馬思贊之印馬寒中印華山馬仲安家藏善本及秀水朱氏潛采堂圖書諸印記鈔寫及書側題識俱精整

後山集

後山集二十卷舊鈔本先君子以秀水濮氏校義門先生評本倩先師朱巢飲夫子過錄記卷首云何義門先生評本乾隆丁酉從濮自崑先生校本過錄義門跋云老學菴筆記云陳無己子豐詩亦可喜晁以道集中有謝陳十二郎詩卷是也建炎中以無己故特命官李鄴守會稽來從鄴作攝局鄴降虜豐亦被繫梟而去無己之後遂無在江左者豐亦不知存亡又康熙己丑秋日從吳興鬻書人購得舊鈔後山集殘本中闕三四五六凡四卷勘校一過改正脫訛處甚多庶幾粗爲可讀而明人錯本誤人真有不如不刻之歎也焯記又後山集十年前始得見明宏治己未南陽王懋學所刊脫誤至不可讀訪求宋刻於藏書家而未獲也康熙己丑吳興鬻書人邵良臣持舊鈔殘書五册來售余取而與宏治本互勘則其所脫誤者皆在雖出於元版已非魏昌世所次詩六卷文十四卷之舊然猶之爲善本也其中缺第三至第六凡四卷非仍得陳同甫編校者及向上宋本不敢妄爲補寫蓋新刻有與無均耳不讀而充數者尙之

弗如其無也。是歲中秋日。何焯記。

雙峯集

雙峯先生集九卷。初白太史校本。前有八世孫泰亨。及永樂丙申徐鍊。正統元年劉球序。後有李大異撰墓志。七世孫佳。及永樂二十二年舒仲誠。洪武癸酉劉鉞跋。及高才贊。初白翁手跋云。是集初刻於宋甯宗嘉泰四年。公季子邁所編。先生自序。題曰雙峯猥棄。至理宗淳祐七年。再刻於連山。章枕山有序。元初。公之七世孫名世重刊。有歐陽冀公序。未幾板燬。洪武中。八世孫泰亨以家藏舊雕本。重刻於南昌。訓導劉鉞志其本末。正統中。十世孫守中重刻。劉忠愍爲之序。今所鈔者。照正統本。第八卷中缺七言律詩三首。第九卷中缺訓後一條。據別本補入。康熙庚子重陽前四日。慎行識。所補之條書于卷首云。慎行於江西書局。見是集鈔本第九卷中。尙有訓後一條。今補錄。惟余之在職。存心處事。必欲上通天意。下合人情。買田築室。勤儉得之。後世子孫。優必閉于詩禮。勤必苦于耕讀。教子擇嫻。慎終追遠。毋螟蛉異姓。以亂宗祧。毋勇很非爲。自罹刑憲。倘違是言。則必爲人指笑。曰。舒通直郎子孫所爲如此。可不慎哉。此條補寫第九卷中。此冊有慎行。初白庵主。南書房史官諸圖記。

雪溪集

右舊鈔本。止五卷。四庫書目云。原本八卷。今佚三卷。蓋不復有足本矣。此本卷心題觀稼樓鈔書。有玉峯徐氏家藏。及沈廷芳。菜園。晦藥軒諸圖記。集中載國香詩二首。一原作一次韻。其元唱。非銓作也。銓詩乃

次韻耳。鈔本不標題名氏。而以元作附錄者書前。致相溷耳。安得它本正之。壬午立春日又記。

夾漈遺藁

右舊鈔本三卷。詩五十六首。文七篇。

鄂州小集

右六卷。國朝程哲輯錄。此從程氏刻本傳錄者。首有哲序。並鄭玉、趙汾、趙燠、李宗頤、宋濂、王禕、馬誠、蘇伯衡、林公慶、祝允明諸原序。裔孫文達、從裔孫朗原跋。及曹涇撰傳等篇。後附鄂州遺文四庫目錄作六卷。附錄二卷。此本附錄即在六卷中。目錄謂其集本劉清之所編。此本叢雜少緒。似非原帙。又云附錄二卷。爲其兄頌姪似臣之文。今是編但有頌文。而無似臣文。

網山集

舊鈔本月魚先生網山集八卷。有劉克莊、林希逸二序。

誠齋集

舊鈔本誠齋集四十二卷。無序目。後題嘉定元年春三月男長孺編。端平元年夏五月門人羅茂良校一條。卷內有朱筆藍筆評點及校字。每冊有以甯呂叔子印。楨以甯之印諸圖記。

後村集

右五十卷。藍格鈔寫。極精。卷內朱筆評點。前有秀水朱氏潛采堂圖書印。卷首林希逸序。目錄後題迪功

郎新差昭州司法參軍林秀發編次。後有武林盧文弨手校圖記。四庫書目作六十卷。今此實止五十卷。

玉楮集

右刻本八卷。先君子錄抱經先生跋於前。並書後云。右玉楮詩稿八卷。據岳倦翁跋。自寫清本。凡百零七版。今正合其數。每卷首題十六世孫元聲等藏墨。殆明時即依倦翁手錄傳寫付梓。故版數適符。而字句間猶不免晉豕何耶。至跋中又云。偶至海甯訪友云云。海甯不知何地。攷今海甯州。宋時鹽官縣。至元天厯二年。始改海甯縣。惟歙之海陽縣。晉初嘗稱海甯縣。隋改休甯縣。是宋時亦未嘗有海甯之稱。豈亦刊梓時人妄改。或係後人偽造此跋。然元聲爲時名臣。刻其先集。不應鹵莽若此也。偶讀盧學士抱經堂集跋玉楮集云。未見刊本。因錄其跋語於卷首。以見前輩好古之篤。并憶先生昔過艸堂。登拜經樓。徧覽藏書。而此編惜未寓目。今先生之歸道山。已十餘寒暑。聞抱經堂遺書散佚殆盡。而予之抱殘守缺。所藏雖未能若先生讎校之精。幸而未散。然歐公有言。物聚於所好。而散於所不好。人生數十寒暑耳。孜孜矻矻。露鈔雪購。欲子孫常爲世守而弗替。豈不難哉。豈不難哉。嘉慶十三年歲次戊辰中秋日。海甯吳某識。

又書首頁云。昔張杞園嘗以玉楮集貽王漁洋。乃明衡府高唐王所鈔。漁洋有跋。以爲楮墨裝潢。竝極精妙。未識視此何如。庚午五月某又記。又別紙錄蠶尾文集跋語一條。書下云。按高唐王與吾家舊藏臨江王圖繪寶鑑。裝潢精整。蓋明宗潢之好古者也。識之。

林同撰一卷。劉克莊序。查初白先生從崑山徐氏借千頃堂鈔本傳錄。前有臨安府柵北大街睦親坊南陳解元宅書籍鋪刊行一條。後有跋云。林同字子真。寒齋林公遇子。福唐人。卽宋史忠義傳中林空齋也。史逸其名。予考證得之。爲載入統志人物中。戊辰元旦書。不著書者名氏。初白先生記云。此金陵黃氏千頃堂鈔本。乙丑余客都下。曾於俞邵案頭見之。今歸玉峯季子。甲午九月借鈔畢。附識。初白翁。下有慎行。初白菴主。得樹樓藏書。查慎行印。南書房史官。及查岐昌印諸圖記。

肇論中吳集解

中吳集解三卷。釋淨原集釋僧肇所作四論而解之者。首有慧遠序。末有淨原後序。宋本傳是樓藏書。有東海臣炯別號自彊。徐章仲所讀書。徐炯章仲。徐炯收藏書畫。傳是樓。二漢書屋。徐炯收藏祕笈。宋本諸圖記。書側題識。猶其手筆也。菴竹堂書目載此書。不記卷數。但云三冊。

中和集

元本中和集三冊。前題邵梁清菴瑩蟾子李道純元素撰。門弟子損菴寶蟾子蔡志頤編。前集一卷。後集二卷。續集三卷。別集四卷。新集五卷。外集六卷。無序。按菴竹堂書目載此書一冊。不記卷數。道藏目錄載是書六卷。並謂爲通儒貫釋之至言。

柳塘外集

右舊鈔本二卷。釋道琛撰。師孔序。四庫書目作四卷。與此不同。按師孔序云。錄其詩百有二首。今集中

之數相符似無缺佚。閱本所據蓋別本耳。是冊前有海甯楊氏崑木藏弄翰墨圖書傳之有緒二印記。

佩章齋集佩章齋輯聞

舊鈔本佩章齋集十六卷。熊禾序。輯聞四卷。德鄰自序。前有海鹽夏曉峯書畫記印。後有聞人訥甫祕笈之印木印。

富山嫩稿

舊鈔本富山嫩稿十九卷。前題從曾孫方宗大編集。有周瑄商輅二序。周序謂曾孫宗大既嘗編次。今五世孫文傑復能珍藏校正。以壽諸梓云云。蓋是本爲重編付刊。四庫書目作十卷。或猶是初本與。

滄浪先生吟卷

舊鈔本嚴滄浪集二卷。陳士元黃清老編校。黃公紹序。

宋高僧詩選

舊鈔本宋高僧詩選前集一卷。後集二卷。續集一卷。陳起輯。

剡源文鈔

右刻本四卷。前有本傳自序。先君子親筆評點。記後云。予心慕剡源文集數十年。嘉慶甲子始購得是編而讀之。漫識卷尾。齊雲采藥翁。時年七十又二。又書居易錄。戴以古文名淳祐。大德間與柳貫齊名。數語於卷首云。按宋淳祐時表元年方幼齡。下至大德。幾五六十載。且道傳生更後。亦不得云齊名。又附

錄馬寒中先生跋語於卷首。寒中跋云：歲丙辰丁巳，黃黎洲先生講學海昌。先君子時與之往復議論，惜思贊童稚，未能備悉精奧也。先生每極口宋戴剡源文，府君購其集不可得。後從叔氏日觀齋見先生所寄還本，遂命思贊刻之家塾。閱歲書成，府君見背。年來多故，未暇整理。昨冬與竹垞先生借得全集，復發與修補欠葉，校讎訛字。其去取批抹，悉依黎洲原本，不敢妄有增損。蓋遵先府君授刻之意也。因憶幼侍府君與先生晤對，已歷二十餘寒暑，而府君卒於庚午。先生與日觀叔亦相繼下世，重展是集，不勝慨然。康熙庚辰七月既望，海甯馬思贊識於紅藥山房。

魯齋遺書

舊鈔本魯齋先生集六卷，末卷爲附錄，首有嘉靖九年康海序，嘉靖三十九年衡府新樂王序。王序署分封青社衡藩新樂王，誠軒道人載璽汝符父書於少和山房。此本有不遠復堂難得幾世好書人趙北溟印，無黨、蘊真、翼雲、恥齋諸圖記。攷明史稿列傳，稱新樂王博雅善文辭，諸撰集多可傳者。高唐王厚煥、齊東王厚炳，皆以博學篤行聞，亦可見衡府之多賢王也。

道園學古錄

道園學古錄五十卷，元刻本，每葉二十六行，行二十三字。前有至正六年歐陽元序，爲陳書崖先生藏本。有劉氏家藏、陳氏家藏、書崖珍祕、天都陳氏承雅堂圖籍、陳書崖讀書記、陳氏藏書、子孫永寶諸圖記。先君子八分書題前云：予友鮑綠飲書云：生平見學古錄數本，獨未見此本，驗其楮墨之精，當屬元時初

刻本。又爲覓舊鈔學古續錄見遺。俾成合璧云。嘉慶癸亥秋九月既望吳某志所云學古續錄。卽道園遺集。乃公諸孫堪手輯。至正庚子黃潛跋某又記。

道園遺稿

右鈔本六卷。綠飲先生所贈。末卷爲樂府。附鳴鶴餘音。乃公與全真馮尊師合作。蘇武慢無俗念詞。也是編爲從孫堪克用所輯。前有至正己亥楊椿序。後有至正二十年黃潛序。堪有題識。樂府後有公自記。及金天瑞跋。四庫目錄作十六卷。與此不同。今觀楊序云。凡七百餘篇。皆板行。二集所無者。遂分類編次爲六卷。附以樂府。題曰道園遺稿。是所收當止此十六卷者。或併二集數之歟。

陳衆仲集

右元刻不全本。僅存詩賦三卷。序一卷。首有明沈氏麟手書元史本傳。并記云。衆仲集不多見。嘉靖丙申。偶得此元朝刻本。因手錄其傳於前。以識歲月。七十二翁竹東沈麟書。先君子題云。按千頃堂書目。陳旅安雅堂集十三卷。今世行本大約相同。予舊藏此元刻本二冊。題曰陳衆仲文集。攷諸家簿錄。皆未見有此目。未審其同異若何。卷首林泉子序。作于至正辛卯。距衆仲之卒已十年。當是其子觀最初刻本。雖僅存四卷。而詩則已全。零編盡簡。何可不什襲珍之。免牀記。又書別紙云。按元史本傳。文集十四卷。不知卽此集否。簡明書目。安雅堂集十三卷。遺書目云十四卷。元百家詩選小傳。安雅堂集一百廿四首。元刻陳衆仲集一二卷一百六十九首。三卷一百五十九首。通計三百廿八首。較元詩選多二百四首。嗚按

蕘翁手札。知其家有元刻七卷。並多張翥序一篇。曾許補入。當更訪之。

方叔淵稿

方先生遺稿。五言詩四十二首。後至元己卯樊士寬所鈔。有跋。及次先生自趙屯歸城中韻詩。又有王東題語。是冊面葉題寄樓鈔藏。有寄樓東萊仲子手鈔二印記。

江月松風集

江月松風集十二卷。金氏憲邦從思復先生手書本鈔藏。筆札甚精。後有詩補二葉。明陸嘉禎補四首。曹潔躬先生從所藏元人真蹟補。再次廷璋長史留宿韻二首。題云。余家藏元人真蹟。有此二詩。乃知江月松風集。尙多遺佚。思復以書名。卷册流傳人間者。隨見當補入也。又從玉山名勝集。李氏畫卷。崑山雜咏。補詩三首。金跋云。錢思復爲有元詩家。筆墨旆册。多有傳者。獨全集渺不可見。洞庭山齋得觀思復手書。江月松風集。爲錢叔寶。曹潔躬所收藏。紙墨完好。殊可寶愛。因手錄一通。藏之篋笥。并使同志者得共傳覽焉。丙寅閏四月二十五日。金憲邦記。後又錄補遺二首。書云。戊辰嘉平月小除夕燈下。錄於半園之齋。然亭迂齋。四庫目錄云。其集在明不甚顯。此本乃曹溶得惟善手稿。因傳於世。蓋卽是本所從出也。

夷白齋集

右舊刻十二卷。義門先生手校本。多所補正。卷末鄭國公。王處士二墓志。先生從吳下冢墓遺文所錄。石刻補正版本漫漶處。手書於後云。夷白集末卷鄭國公。王處士二志。板本漫漶。予從汲古閣借得錢叔寶

手錄吳下冢墓遺文續編二志在焉。據叔寶云錄於文氏停雲館所藏石刻者。余取□□□□則企□□□刻所避而刪□者。乃非一處。□□□復不免。聞往時述古堂收藏夷白□□□當年稿本。不知今落何人手。得之乃可是正耳。康熙庚寅焯記。又讀王處士志。可見淮張待士之厚。草竊破亡。而遺老猶思之不置。蓋有足以感人者耶。淮張無大略遠謨。此固其一長也。又記。惜是冊間有剝落。補字及跋語。未能盡讀為憾耳。按讀書敏求記三十五卷外集一卷。云宏治乙卯張習廣搜敬初詩文。勒成十二卷。刊之。志其後云。先生文集名夷白者三十四卷。留吳下士大夫家。祕不傳。蓋當時原書難覩。故所刻不全。君子惜焉。此從其稿本摹寫者。先君子書此條上云。綠飲題云。張習刻本。每有出於三十五卷之外者。當時所據者不知何本。又玉山雅集錄敬初詩。大半不在集中。知夷白齋稿遺佚者多矣。安得好事者廣為搜輯。以永其傳焉。按此本後無習題識。而楮墨精雅。當是宏治初印本耳。

石門集

舊鈔本石門集十五卷。嘉靖壬子李先芳序。黎卓傳鶻後序。四庫書目作七卷。未審視此本何如。

斗南老人集

右鈔本四卷。間有缺字。首序題墨林後學。

說學齋稿

危太樸集四卷。鈔本。吳石倉先生藏書。有朱墨筆校補處。卷首有石倉手校。及吳□嘉印州來氏藏書記。

二印。卷首載竹垞先生說曰。太樸說學齋文傳鈔都非足本。雲林詩集係葛邏祿易之所編。前有虞伯生送行序。卽後雲林集三卷是也。

雲林集

雲林集鈔本。南陽迺賢易之編。虞集伯生序。詩二卷。文一卷。查初白先生藏本。有其手校。及南書房史官印記。卷二後初白先生手書云。按黃文獻公酒所作太常博士危府君墓志。府君諱永吉。字德祥。徙居雲林三十六峯之陽。卽太樸之父也。詩名雲林集。當以此慎行識。又云。虞伯生有清明山房詩。爲危太樸作。又次韻太樸讀書山中見懷之作二首。皆載學古錄二十七卷歸田稿中。今檢雲林集皆失原作。又宋景濂有題危雲林訓子四言詩後云。危公冢子。字於幃。自檢討奉常遷佐薊州。將之官。賦四言詩一章。勉之云云。今亦失原作。卷一後補梅仙峯七律一首。從撫州舊志采出。亦先生親筆。

林公輔集

天台林公輔先生文集一冊。不分卷。初白菴藏本。補書目錄于前。並跋云。林公輔名右。明洪武朝人。被薦授職閣門下。所著文計一百五篇。不分卷帙。余得鈔本於友人齋頭。補綴破爛。別錄如右。原本舊用硃墨校閱。每篇段落及字句之間。多有鈎畫甲乙處。於作者命意眉目分明。要是留意於先民矩矱者。故并其圈點悉依原本。以存其舊焉。初白翁又按。先生臨海人。洪武中與葉見泰等並徵官中書舍人。與方正學友善。嘗奉璽書行邊有功。進春坊大學士。命輔導皇太孫。以事謫中都教授。棄官歸。靖難初。聞正學被禍。

爲位哭於家。成祖召之不至。械至京。猶欲用之。先生對曰。罪人逃死已久。藉令可仕。當與方孝孺同朝矣。成祖怒。髡之死。南渡後。追贈禮部尙書。諡貞穆。事載華亭明史列傳。世但知先生爲文士。罕有稱其忠義者。特表出之。康熙辛丑四月。查慎行再識。

滄螺集

蘇大雅著。六卷。前有宋濂撰東家子傳。後有薛章憲跋。汲古閣刻都元敬跋本。

草閣集

草閣集六卷。後附篤谷集一卷。宋濂序。後跋不全。未知撰者名氏。

圭峯集

羅文肅圭峯集三十七卷。錢湘靈先生評本。朱墨紛綸。印記重疊。四庫書目三十卷。此多七卷。

姑蘇雜咏

右一卷。明高啓著。周傳編。有洪武四年啓自序。三十一年傳後序。卷首有楊李項藥師藏。峴峯山人諸圖記。

六臣注文選

六臣注文選三十卷。汲古閣刊何義門先生七校本。先君子從盧學士抱經堂借本手錄。並書首頁云。按唐書曹憲傳云。憲始以梁昭明太子文選授諸生。而同郡魏模、公孫羅、江夏李善相繼傳授。於是其學大

與句容許淹者。自浮屠還爲儒。多識廣聞。精故訓。與羅等並名家。羅官沛王府參軍事。無錫丞。模武后時。爲左拾遺。子景倩亦世其學。以拾遺召。後歷度支員外郎。善見子邕傳。今世第傳文選六臣之注。而餘人罕有著聞者。

唐音戊籤

戊籤八百十七卷。義門先生評本。先君子從淥飲先生知不足齋借錄。後六册係巢飲師手書。並補鈔缺頁。記後云。戊籤六册。臨始於閏七月之朔。畢於九月九日。日閒不無作輟。過於燈下者居多。是以作字麤細不勻。中間缺頁。俱爲補寫。但未釘入耳。至字畫疑者闕之。無疑者易之。然尙有疏忽處。鉅眼可復校正焉。丙午九月燈下。書於金閨之客館。巢飲識。先君子書云。何義門學士評點唐音戊籤。攻韻語者得之。不翅枕中鴻寶。恨其流傳甚少。此本予從知不足齋主人借錄。有六册。未竟。朱巢飲茂才時館於姑胥小漆園中。適見予行篋。有此六册。遂爲卒業焉。嘉慶庚午春。兔牀山人識。時巢飲沒已越歲矣。其中夾簽甚多。爲從兄梅峯先生手筆。先子記曰。從子延清。摘其可疑者簽出。有爲予筆訛。亦有原本誤者。不無有益於此書也。

戊籤餘

右戊籤餘稿本。有硃筆。有藍筆評點。竝按語。又別紙書云。法雄寺東樓。七絕釋圓至曰。郭氏王孫富貴。封爵至開成後。猶不絕。其宅不應在貞元元和中。已爲寺。然郭晞傳云。盧杞秉政。多論爭。郭氏田宅。德宗稍

聞。乃詔曰。子儀有大勳。嘗誓河山。勒金石。自今有司。毋得受按。按此詔。雖禁有司論奪。未嘗以應有者還之也。夫以子儀之肉未寒。而不保其室。德宗待功臣何薄耶。是書本八冊。先君子以七冊贈文漁徵君。而留其一。書後云。予收得戊籤。餘八冊。海鹽張芑堂明經愛玩。不忍釋手。因割七冊貽之。而自留此冊。以見前輩用力之勤。非後生所能及也。己酉夏日。槎客記。又云。余所藏有何杞瞻學士評閱唐音戊籤全部。極精。誠學詩者之津筏也。庚午暮春。又記。

唐分類歌詩

趙孟奎分類唐歌詩。原本百卷。此僅四冊。蓋從宋本影鈔者。首有咸淳改元孟奎自序。序後爲總目。分類凡七。天地山川類三十二卷。朝會宮闕類八卷。經史詩集類三卷。城郭園廬類二十卷。仙釋觀寺類十二卷。又十一卷。此十一卷。疑別爲一類。鈔手偶脫去標題。名目一行耳。兵師邊帥類二卷。草木蟲魚類十二卷。每葉十八行。行十八字。總目及每卷首行。題某類卷第幾。下空二格。題趙孟奎。又空一格。題分門纂類。次行題唐歌詩。下列總卷數目。蓋亦所謂大名在下。小名在上者。每卷各有子目。每首詩前低二格。書題。次行低五格。書人名。行款亦爲近古。後有毛斧季二跋。及附錄葉文莊書唐歌詩後一條。先君子跋。見愚谷文存。此書云。何義門評點唐音戊籤中一條云。趙孟奎分類唐歌詩殘本十餘卷。汲古毛氏收得之。今歸蔣生千道。然則予在吳門所見者。豈千道所藏本耶。當更訪之。己酉立夏日。某又記。又云。嘗見劉一清錢塘遺事。載咸淳閒詔行官田之制。趙孟奎自陳投賣。蓋是時賈似道當國。以軍興國用匱乏。特下此令。

官民騷然。莫有應者。自榮王倡之。繼是惟文耀而已。可謂賢而有識者矣。使天水宗潢。皆能如文耀之公忠體國。又豈懼白雁飛來乎。甲寅夏五又跋。又云。癸辛雜識又載春谷在衢州斬大蛇事。亦可見膽識。庚午夏又識。時年七十有八。又云。趙春谷梅亭曰。東風第一見癸辛雜識。

會稽三賦

會稽三賦不分卷。前題東嘉王十朋撰。次剡谿周世則注。郡人史鑄增注。并撰釋音附入。有嘉定丁丑鑄序。每葉二十二行。每行大小字二十均空一格。黃堯圃主事跋云。宋本會稽三賦。往予所見有三本。一得諸顧八愚家。一見諸顧五癡處。今歸潛研堂。一見諸顧抱沖所。八愚五癡爲昆仲。其兩本悉屬舊藏。若抱沖則得諸它處。非郡中物也。然皆大字不分卷。每半葉九行。每行大十八字。小卅二三字不等。注中有注。此板板式與前所見者異矣。茲本首載史序。第一葉與會稽三賦第一葉誤倒。故印記反鈐于賦之第一葉。應正之。丙寅穀雨後二日。蕘翁識。

瀛奎律髓

馮己倉定遠二氏評本。一用墨。一用朱。己倉書後云。己丑再讀一過。亦閱月而畢。生平所得詩法。盡在是矣。四月廿八日燈下。己倉馮舒定遠書云。家兄讀此書畢。謂余曰。吾是非與弟正同耳。余意未信。今竇伯姪以此見示。取余所評較之。真符節之合矣。今日求可與言詩者。定何人哉。八月廿七日。書於小樓之西窗。家兄沒二年矣。定遠班識。陸氏書云。己倉定遠兄弟稱詩爲馮氏一家學。定遠評駁此書。凡有

三四本并季此本其一也。復取他本評語一一載入。前後心目庶可考見。余又從友人處見己倉閱本。用墨筆錄於卷內。以徵兩馮手眼之同異。云甲辰閏六月三日。常熟陸貽典識。每冊副頁鈐以朱文木印。云聚書藏書良匪易事。善觀書者澄神端慮。淨凡焚香。勿捲腦。勿折角。勿以爪侵字。勿以唾揭幅。勿把穢手。勿展食案。勿以作枕。勿以夾刺。隨損隨修。隨開隨掩。後有得吾書者。並奉贈此法。余嘗仿此刻一印。惟易末二語云。後人寶遺書者。必當謹守此法。

宋人小集

宋人小集十六種。姊壻許梅隱所贈。爲何潛齋集。傅忠肅文集。晁具茨集。高彥先集。謝幼槃集。浮溪集。白石道人詩。佩章齋集。倚松老人詩。瓜廬集。雪巖西隱集。雪磯叢稿。疎寮集。雪林集。病榻小集。秋江集等。先君子題云。許甥懋堇舊藏此。南北宋人集十餘家。似從江湖羣賢等集鈔合。中間敘跋。閒有明人手筆。惜乎家數寥寥。不及十之二三。然終屬舊鈔。可存披閱也。嘉慶戊午兔牀識。

二妙集

右舊鈔本八卷。前有草廬先生序。虞伯生先生所撰段氏世德碑。後有泰定四年別嗣輔跋。成化辛丑賈定跋。

大雅集

右舊鈔本八卷。前有錢肅。楊維禎。及良自序。後有王逢序。先君子命兄壽照書竹垞先生跋于末。簡莊徵

君借閱校補數處鈐圖記於卷首。

樂志園集

舊鈔本樂志園集八卷。後附補遺。元崑山呂誠敬夫著。先君子校閱。復經黃蕘圃先生以家藏秀野堂鈔本互勘。手書補正脫誤。蕘圃題云。此冊爲兔牀山人藏本。并手校者。介髯翁示余。余取舊藏顧秀野鈔本勘之。大段略同。而詞句互有得失。至命名則有異。此云樂志園詩集。一至八卷。余本則分題各爲一集。一云來鶴草堂稿。二云旣白軒稿。三云竹洲歸田稿。鄭文康後記外。又有鶴亭唱和一卷。又有十葉亦敬夫詩。無集名。未知云何。此皆脫之矣。卷一內。此多南海道中三首半。各本皆空白。因據補余本。余本竹洲歸田稿內。多杖屨云云至答之。此本脫也。亦據余本補入。鄭記不全。亦據余本足之。初余校此冊。未半卽病。病且幾死。自謂校讎事絕矣。幸天憐余之好古書。而不致與書永訣。新歲謝客竟。畢校此冊。良友之託。幸遂宿諾。予喜而良友當亦共喜也。唯鶴亭倡和已下詩。卷帙甚繁。不能任此筆墨之勞矣。當俟它日命鈔胥續之。嘉慶歲在丁卯。陔月哉生明。復翁丕烈記。後附歲暮懷人之一云。異地能同好。一州得兩人。僑居情久密。謂髯翁過訪跡常親。君每過吳必至余舍屢寄書相賞。曾遺畫絕珍。蒙君作員囑訪書圖以贈髯翁倘歸去。爲我賀新春。每歲底託髯翁帶拜帖稱賀其鄭文康記。及歸田稿內杖屨云云至答之。皆補於卷末。前後有蕘翁更字復翁。蕘圃手校圖記。

荆南倡和集

荆南倡和集一卷。元馬治季常、周砥履道二人遊荆南，誦唱之作也。前列鄭元祐序及季常履道自序。後爲附錄，亦履道留別季常及寄懷詩。季常所作履道哀辭及追悼追和詩。又有高季迪後序。重讀荆南集有感詩。徐幼文、李□□、張□□諸人題。先君子從鮑氏知不足齋，明初刻本傳錄手校，並輯荆南集附錄於後。此冊書後云：荆南唱和集一卷。元明之交，極爲鄭明德、高青邱、徐幼文諸公所稱賞。傳本絕少。予從鮑君以文知不足齋借得，蓋猶明初刻本。因亟傳錄其副，并采摭記傳爲附錄。係卷末。予生平最愛荆南山水之勝，往來數十年，行篋未嘗一日無此書。今老矣，足不能出戶，每一展覽，慨想前輩之風流，邈不可追，并念與荆南朋好疇昔唱酬文酒之樂，不禁爲之閉筆慙然也。嘉慶壬申季冬，海甯八十老人吳某跋。

此後簡莊徵君題記云：嘉慶癸酉孟春，郭海陳鱸借錄，并對勘一過。

赤霞集

赤霞集一冊。五古、七古、五律、七律、五言排律、七言排律、五言絕句、七言絕句。各體爲一卷。首題赤霞公詩鈔。梁溪浦義升朗公著。下題男伯熊涓飛手錄。有陳鼎新、閔自寅序。傳略一篇。無作者名氏。面籤書赤霞集。吳鍾櫛選。又浦義升崇禎辛未貢一條。先君子書後云：赤霞集一卷。乾隆己亥秋日，購之花溪故家朗公、崇禎中嘗司鐸海昌，與許金牛爲布衣交。故花溪兩垞之間，猶有傳其集者。此編前署男伯熊手錄。豈尙其子舊鈔耶。按赤霞集千頃堂書目不列卷數，恐尙不止於此。是編簽題爲吳公櫛所選，則益足重矣。竹垞明詩綜錄五律石城一首。周松靄云：面書崇禎辛未貢一行。恐是齷舛選詩時手筆。果爾，則又可

喜也。長至後二日。吳某識。又題。予藏此書二十餘年矣。每觀封面題字的。爲小長蘆叟筆。而松靄大令之言。洵不謬也。嘉慶乙丑。兔牀。

南濠文跋

都元敬南濠文跋四卷。鈔本。無序目。

王百穀集

百穀先生集六冊。爲晉陵、金昌、燕市、竹箭、青雀、明月、荆溪、疏延、令纂諸集。先君子記云。嘉慶庚申。搆得百穀先生集。其評點者。未審何人。若估謂是前輩許仲章明經筆。未知然否。兔牀志。青雀集有西河毛文煜序。先君子書云。此亦毛西河。

漸江文鈔

查韜荒先生文鈔。其壻談禘初先生所輯。先君子傳錄。書後云。泚翁負卓犖之才學。爲竹垞諸公所推服。此彙予從其後人借鈔。尙有漸江詩鈔。惜未及錄。其生平境遇多艱軻。晚客茶陵而沒。同邑朱茂才亦大與泚翁中表兄弟也。有悼韜荒詩云。路傍香艸霧中花。采采其如秋望賒。哀些欲招無處所。不知雲雨散誰家。觀此。是泚翁楚遊時。乃眷一煙花而死於其家。亦可慨矣。亦大名淳。日觀先生子也。有曉亭詩鈔。乾隆甲午春日鈔。重午後三日。校于拜經樓。

衍齋詩卷

右刻本衍齋詩四卷。先子跋云：寒中上舍，生平與查初白先生交最莫逆，故其詩律之風神流麗，一往情深處，頗極相似。至擬古樂府詞質意古，使人味之不盡。雖初白尚有不及，予家去插花山僅一舍，每登樓東望，惟見寒烟衰艸，亂雲滿目，慨望昔日之風流，非特琴書圖籍散亡略盡，卽道古樓之故址，且不可蹤跡。頗深生不同時之恨。又云：衍齋詩予家尙有大字刊本，詩多有不同，蓋刻在後也。并附查惜吟香稿雕板甚工。

天啓宮詞

右宮詞一百三十六首。蔣之翹作。前有自序。先君子校有按語數條。簡莊徵君跋云：明詩綜蔣之翹字楚祥，秀水布衣。甲申後，隱于市。詩話：楚祥居射襄城，詳對楚詞。晉書：韓柳文集，鏤版以行。又輯構李詩乘四十卷，搜錄鄉黨先正詩無遺，兼能備舉軼事，使聽者忘倦。晚年無子，書籍散佚無餘。詩乘亦亡，可歎也。按明詩綜選秦楚芳天啓宮詞八首，而靜志居詩話嫌其述客魏居多，而事關德陵者寡，不無微憾。此楚祥所作，較之楚芳作爲詳備。乃詩綜並不選入，豈竹垞先生猶未見耶。鱣記。

擬故宮詞

右鈔本四十首。唐宇昭作。先君子題云：唐宇昭字孔明，家富藏書，毛斧季嘗聞其有宋稟趙孟奎分類唐詩一百卷，展轉倩友借之而未得。詳拜經樓詩話。

西邨老人詩集三卷。後附補遺。乾隆戊午重刻本。先君子補錄遺詩五首於卷末。跋云。余偶得陳勾溪先生手書詩一篇。風骨蒼秀。如其爲人。愛玩不忍釋手。吾友陳仲魚復以西村老人詩數首見遺。亦其遺墨也。書視勾溪雖稍樸致。而詩格高雅。似又過之。因補錄卷末。併附勾溪作於後。時丁酉十二月。兔牀後學吳某識。

九嚶先生集

右舊鈔本雜文詩詞一卷。首敘。不著姓氏。

棗林詩集

棗林詩集。談孺木先生所著。凡古近體詩三百三十七首。後有錢朝瑋所作傳。先君子序。見文存續編中。此冊用硃筆照原本圈點。並附錄竹垞檢討靜志居詩話。他山先生人海記二條於末。有按語。

遺老高風

右鈔本一冊。首爲陳乾初先生山中約。次爲祝眉老先生忠魂歸夢記。次爲乾初先生東海山臞祝遁角山養吾子蔡遵來雲先生蔡沛黃山大辛子許齋諸公詩。又次爲山臞先生項子魂遊記。及研譜研譜餘致。未爲耕煙老農祝子夏斯文快事。諸先生詩前。有當湖施洪烈三哀詩并序。序內謂祝光侯許元五祝開美三君。詩則止哭光侯先生者。並附與其仲叔季三人詩。先君子書後云。乾隆丙申重九日。登高龍山。偶得是書。皆海昌遺老詩文雜著。雖卷帙無多。而流傳絕少。予不敢自秘。別錄一本。以贈吾友陳君仲

魚俾與大學辨諸書同藏于新坂家塾。此本則猶是龍山舊鈔也。嗟乎。南村風景。恍焉如昨。而諸公高閣。邈不可追。是一編者。將以爲錦里先賢傳觀之可也。以爲宋遺民錄觀之亦可也。庚子秋七月。兔牀後學吳某記。

古民先生集

右詩一卷。陳古民先生手彙。集名來兩。先師巢飲夫子記云。昔在吳中。於許生案頭。見古民所書論詩畫冊子。遊雲驚龍。幾入神品。蓋古民時寓硤之薇山。書此以贈。及門許公葵元也。冊後但鈐古民二字圖記。而不題姓氏。竟不知爲何許人。今覩是集書法。一如昔年所見。又得兔牀山人表而章之。則十餘年之蓄疑。一朝頓釋。真快事也。巢飲誌。先君子書後云。陳梓字俯恭。一字古銘。家秀水之濮院。學宗洛閩。工詩。書法得晉唐之遺。晚右臂病。擊常運左筆。後居姚江以老。此彙詩字俱佳。陳子珍之。槎客記。時距作詩後一甲子。冬十二月朔日。又書。觀末載藥酒方。豈書此詩時。已在擊臂之後乎。又記。

尊聞錄

右爲汪水蓮先生維憲所著。先君子從魏君小洲處得之。小洲記云。吾杭前輩汪水蓮先生。殖品清華。學閎淵雅。所與交皆知名士。偶從市攤拾得此冊。雖非足本。味其言論尙友。真今之古人。聞全帙質存某處。需索厚價。兼靳借鈔。誠恨事也。庚午仲冬大雪節前一日。小洲誌。先君子書云。積山名維憲。陳句山紫竹山房集有詩集序。敘其出處頗詳。謂可入獨行傳。是編乃魏小洲弑偶於舊攤購得。見跡置之案頭。未

忍釋也。壬申冬仲八十老人吳某志。

嶺雲詩鈔

嶺雲詩鈔一卷。錢唐魏柳洲先生著。原有墨筆評點處。先君子評閱用硃筆。記前云。乾隆乙未五月。閱于拜經樓。

紅柑齋詩草

海甯查堯卿先生義著。先君子傳錄。並手書沈歸愚宗伯評語于上。

汪氏雜著

此爲同里汪立仁先生所著。先君子收藏。題後云。此前輩汪茂才立仁遺稿也。立仁本歙縣人。僑居小桐溪。少工詩。善屬文。以屢困場屋。悒悒不得志而沒。無子。遺藁多散逸。每展斯編。未嘗不爲之興歎也。

韜光紀遊詩

右二卷。宋人遠許時庵二先生序。董浦先生增注。凡墨筆皆先生手蹟也。

陸綸山先生集

綸山先生甯遠堂詩。無序目。後有關頁。

茶洋詩鈔

尙廷楓著。內有墨筆圈點。面頁題紅樹邨莊詩選。

曉亭詩鈔

曉亭詩鈔一册不分卷同邑朱亦大先生著前有東阿葛仙老題七絕二首並卷內朱墨筆評點

震西賸稿

右詩一册不分卷吳灋上董掌衡先生甯銓著中有與先王父賞梅詩先君子題前云嘉慶壬戌冬陳仲魚孝廉獲此稿見貽以其閒有與先處士觴詠詩也每披對閒如讀柳州先友記一過題中同東者爲方鳳逸王晴巖黃禹璋江寶臣陳種邁諸公方爲余姑丈江亦吳人先君子記云江寶臣蘇州孝廉時與先子同寓吳灋治目與伯仲兩兄亦稱莫逆某記又書首頁云掌衡茂才父維新先生與先君子同庚故交最契

蘭垞詩鈔

蘭垞詩鈔一册海甯施自助先生謙著先君子求得遺藁手爲繕錄並作序云施秀才蘭垞海昌人也少以能詩受知於鄉之先達頗自矜許及長累困於制科常鬱鬱不得志雍正乙卯詔州郡舉博學鴻詞蘭垞名在薦中亦不登第老而厄窮益甚唯放情歌詠以據其不平性復狷急善謾罵人是以率不樂與友獨於仁和杭太史董浦爲忘年交唱和尤密庚辰仲秋年七十餘病沒聞伊子前天一孫尙幼意甚悼焉訪其遺藁未得心恆耿耿以爲憾事今年秋予甥孫煥始從蘭垞長女家借是編示余爲虛槎神聽非非想三集蓋其手自芟定者又己已詩殘帙通得古近體如千首輒欣然爲手錄之蘭垞生平詩藁如東笥

此殆其什一。餘多散軼不傳。可惜也。竊怪古今來流離不遇之士。莫不託諸吟編。冀垂不朽。然而湮墜者多矣。若唐之張祜。王璘。竝負不羈之才。蒙薦知己。終以傲物自炫。擯棄草野。慕其文者。皆爲之興歎。今張集具在。而王作無聞。觀撫言。稱璘日賦萬言。口給十吏。則其平日篇章之繁富何如也。故知通塞之理。洵有命存。而流傳之責。的屬來者。予無暇論定。蘭垞之詩。直重傷蘭垞之不遇。而欲巖傳其梗概于來者云爾。元默敦牂十二月立春日。默齋吳某書於清暉閣。

鈞餘集

右朱吾也先生雜文一冊。巢飲先師手寫本。先君子記後云。右朱可人先生。名達。海甯人。諸生。英袖先生之子也。

明詩綜

右初印本。紙墨竝佳。先子記首冊云。張爲儒。蟲獲軒筆記。朱竹垞先生選明詩綜。喜刪改前人之句。然有大失作者之旨者。卽如亭林集中禹陵二十韻。前半大禹南巡守。相傳此地崩十韻。敘禹陵。後半往者三光降。江干一障乘八韻。敘乙酉魯王監國事。而未四句總結之曰。望古頻搔首。嗟今更拊膺。會稽山色好。悽惻獨攀登。詩綜芟去中間往者十六句。則所謂嗟今更拊膺者。竟不知何所指。竹垞選此書。意欲備一代文獻。宜其持擇矜慎。況生平又與亭林交好。沒後錄其遺詩。似不應鹵莽至此也。爲儒字承之。海甯人。貢生。生平湛深經學。惜身後著述多散佚。蟲獲軒筆記四冊。予從其從孫謨借觀。起乾隆戊午十二月二

十六日立春。迄庚申五月三十日。排日而記之。大約經解爲多。因令猶子昂駒錄其經解筆記。雖尙闕而
不全。已足見前輩爲學之勤。幾寢饋于經籍中矣。予家尙有明經所批十三經文鈔。亦人閒不可多得之
書也。嘉慶丙辰八月四日。吳某志于拜經樓。

斷腸集

詩三卷。宋閩秀朱淑真撰。先君子手寫本。並附錄百川書志。詩女史。名媛詩歸。宋詩紀事。汲古閣校刊題
語。巖居幽事各條于前。又記云。某按名媛詩歸。選淑真古近體詩凡一百七十餘首。

肅雝集

右詩一卷。元閩秀鄭允端著。舊鈔本。首爲錢惟善序。次序不書名氏。先君子記云。某按列朝詩集云。允端
集。曲江老人錢惟善。汴人杜寅。爲敘傳云云。然則此篇蓋寅筆也。次爲至正丙申允端自序。末有至正甲
辰杜寅後序。先君子書列朝詩閩名媛詩歸二條于別楮。並書卷首云。提要以肅雝集爲僞託。

玉窗遺稿

右詩一卷。朱巢飲先師手寫本。跋云。玉窗遺稿。予叔高祖妣葛太孺人之所著也。向梓行於康熙辛亥閒。
孺人中子。僑居邑城。板會藏其家。坐中落。竟散亡。無復存。惟長嗣出繼大宗。居小桃源故里。其元孫筠岑。
每以先澤淪亡。自恨生晚。輒泫然涕下。故是集及日觀山人集。特於殘編廢棄中。檢搜而珍藏之。然就兩
書以觀。日觀世尙存十之三。而此集幾等碩果矣。惜無力重刊以壽諸世。不能闡揚先業。傳播芳徽。吾亦

與有責焉。兔牀山人吳君。葵里好古士也。庚寅歲。余館鳳垵。去山人室邇甚。嘗偕吾徒陳生誦隅造訪。一見如舊相識。因窺見案頭陳相國徐太夫人拙政園詩餘一集。係山人所手校付梓者。乃知山人存心風雅。本圖探石室之藏。大槩藁之任。第以是書爲軼發也。頃之山人叩余曰。玉窗遺藁。君家物也。盍出而一讀乎。余唯唯而退。歸徧搜故篋中。不可得。厥後於從兄筠岑架上。檢得是書。爲之喜而不寐。迫欲手鈔一本。以應山人之請。奈薄歲闌。俗冗蝟集。未克完寫。今春復適鳳垵學舍。差得坐定。續寫成書。并識數言。悲予素不能收藏是書。既乏力重刊。敢以繕寫爲勞乎哉。然卒得應山人之請。不負其好古之心也。則又予之幸也夫。時乾隆辛卯孟春下浣。小桃源朱型家識於陳氏之晚香齋。

詩因

大清詩因閨門一集。亦先師手錄。先君子校正。

秋思草堂集

右集爲錢唐女史陸莘行所作。老父雲遊始末。有其甥吳磊跋。此本爲先君子手寫。並附錄尊前話舊各詩于後。跋云。右錄陸氏莘行遺書一卷。莘行爲麗京先生女。適袁花祝氏。今其後嗣無可考。當從祝氏之老訪之。或借其家譜查之。不知此外尙有著述否。吳某跋。

海昌閨秀詩

右爲褚貞周倩齡落花詩。王範蕉雨樓吟。佟陳氏稿。先君子書周詩後云。右落花詩三十律。錢唐魏叔子

賦得一便面。有蠅頭細楷書此。末署癸亥秋盡日。錄海昌女史周儂齡落花詩三十律於林清書舍。冷紅姚宗灝書。書法甚精楷。冷紅未知何人。而周亦不知誰氏之女也。予讀之。愛未能釋。因借歸。命子姪輩錄其副。與褚紉蘭落花絕句三十首。合藏諸笥。俟世之好事者傳焉。海昌故多才媛。由明以來。如朱靜庵。葛南有。陳倫光。皆表表者。而倫光素賞樓集中落花三十律。尤爲時所傳誦。其警句。若沾泥絮果。應同證。入水萍蹤。或再逢。死謝春光。臣盡瘁。生憎夜雨。子成仁。散爲巫峽雲。無影流出天台水。有情處。仲遣姬開後閣。季倫看妾墮危樓。紫絲帳外疑無地。青粉牆西想有家。十六天魔春試舞。八千子弟夜聞歌。紅綰別院。偷飛月。紫玉深宮。竟化煙。吳郡臺荒。歌舞散。漢宮人老。畫圖空。舊雨新晴。諳冷煖。今朝昨日。判悲懽。雖使須眉操管。何以加之。儂齡諸作。纏綿淒婉。託意隱然。蓋亦倫光之後勁歟。癸卯冬日。槎客吳某識。書蕉雨吟後云。幼嫺爲海甯硤川人。太學生涵齋次女。適桐鄉李臨臯。早寡。無子女。夫朱廣文超之輯其吟稿。曰蕉雨樓吟。凡三卷。古今體詩二卷。長短句一卷。余從花溪倪硯翁借得全藁讀之。惜其才之饒。而志之苦也。詩曰。終其永懷。又窘陰雨。非幼嫺之謂乎。會當事有重修郡乘之舉。纂修爲姚江邵太史晉涵分掌藝文者。仁和朱茂才文藻。皆於余有故。因卽錄集名貽之。以存海昌名媛之一種。復摘錄其詩數首于此。設有好事者。取其集而梓之。當與素賞老人後先輝映矣。甲辰中秋後一日。槎客跋。修陳氏稿前有題云。修陳氏爲海昌次升封翁女。大司空學山先生嫡妹。未出閣時所作。秀慧之致。已見一斑。老荆之母姨也。予初婚時。偶爾手鈔。及今展閱。忽忽五十餘年。若俛仰事。戊申八月。南屏。時年七十有一。先君子書此。


後云。次升名之暹。崇禎丙子舉人。學山。其長子數畝之號也。攷陳氏家譜。次升凡五女。第四女適三韓。修世南。廣東瓊山。令第五女名皖永。字倫光。適同邑楊中默。有詩名。著素賞樓集。爲時傳誦。惜其姊能吟詠。而人罕知者。并名字亦無可攷。豈爲若妹所掩耶。素賞樓集中。間有與姊唱和詩。今年秋。武林魏小洲偶得此稟。詒予。因亟錄之。首有戊申八月南屏題字。南屏亦未詳何人也。乙巳蜡月。槎客誌。

花月吟

花月聯珠吟十二首。爲沈氏涵碧所作。及其女雲濤。祝氏竹如和作。予姊景昭氏亦有和詩二首。附集後。先君子書卷首云。沈氏號涵碧。陳清渠太學有爲族祖母沈花月吟跋。會屬余點定。

繡餘草

嘉定白印蘭幽谷氏撰。先君子親筆評點。餘詳拜經樓詩話。



拜經樓藏書題跋記附錄

攷三首見富春軒雜著

宋忠勇軍第三都都虞候朱攷

吳壽暘虞臣

右朱記。同里陳簡莊徵君從山左東野明經得於揚州舊城。無背文年號可稽。並遭磨礱。寸度銖兩。不盡合制。印文亦多剝損。未能明晰。安邑宋芝山助教釋作忠勇軍司延邊事。二指揮第二都都虞候記。江都江鄭堂文學釋作司延邊吏。簡莊徵君作攷。釋爲忠勇軍右進邊第三指揮第二都都虞候。今細加審辨。似當以徵君釋爲正。惟第二都則當作第三都。篆文殘闕處。尙有迹也。攷宋志。侍衛親軍步軍司。有都指揮使。副都指揮使。都虞候各一人。所領步軍。自神衛而下。左右四廂。都指揮使。都虞候左右廂。各有都指揮使。都虞候。每指揮有指揮使。副指揮使。每都有都頭。副都頭。十將。將虞候等。忠勇軍在步軍神衛下。隸侍衛司。咸平五年。以易州兵能禽賊者立指揮一成都。此印。徵君謂是忠勇軍右軍下第三指揮。攷五代史唐傳。有左靜邊都指揮使。晉紀有鎮海興武左右廂開道都指揮使。是每軍下左右廂指揮使。又各有其號。宋沿唐五代之制。當不甚異。進邊云者。猶靖邊開道之類歟。徵君攷又云。鄭堂謂此印是高宗南渡。駐蹕維揚。倉卒時所鑄。按中興通鑑。建炎元年。因李綱議募兵。仍剏禁軍。驍勝。北捷。忠勇。義成。龍武。虎威。

折衝果毅定難靖邊凡十號每號四軍此云第三指揮其四軍之一歟。又按渡江後官印多亡失禮部更鑄給之。加行在二字或冠年號以別新舊。茲不冠以年號者明此軍初復無新舊之嫌也。惟時方草創三衙之制未備立御營司有御前諸軍都統制容齋五筆載所進劄子請正三衙之名時不果行。然建康志御前諸軍都統制司題名記王權以龍神衛四廂都指揮使甯州觀察使殿前司忠勇馬軍統制除武康軍承宣使差充建康府駐劄御前諸軍都統制是仍帶指揮之職而忠勇更屬殿前馬軍司矣。又建炎後將兵屯駐復有忠勇遊奕甯宗嘉定三年以江陵忠勇軍爲御前忠勇軍則似此軍廢而復置屢有增易忠勇之號不獨侍衛步軍成都指揮而其典禁衛職近事親固直隸御前者矣。此記視予家端拱二年拱聖下十都虞候朱記稍不逮然古色黯然篆法深秀其銅質鑄造不及他印之精整正鄭君所謂倉卒時所鑄者耳。嘉慶丁丑九月吳壽暘識。

金勾當公事印攷

右金源印長宋尺二寸一分廣同重二十兩柱鈕高寸三分厚五分文曰勾當公事之印背文爲土花繡蝕字畫不能明晰。向止釋出正隆四年四字頃復加洗剔定爲六年非四年下有八月二字左方尙有汁少府監造五字攷正隆六年爲宋紹興三十一年是年金主亮方悉師侵宋是以有勾當公事之稱。金時本有勾當公此云勾當公事蓋發兵則給此印猶宋史曹彬歸自江南進勝子云奉敕差往江南勾當公事。是也。其稱汁少府監者亮以六月至南京四月詔百官先赴南京治事尙書省樞密院大宗正府勸

農司。太府少府皆從行。此印鑄于八月。故少府上冠以汴字。時蓋草創。尚不若正大二年印之稱大。名行部。與定元年印之稱行宮禮部。歟。稽其鑄造歲月。與本紀若合符節。是可互證。惟是背文填掩。須映日視之。字迹始顯。阮中丞山左金石志所載。弟據印文摹入。未悉其全也。

蒙古景州印攷

甲戌四月。於武林天水橋舊肆中。得銅官印一。朱文四字。曰景州之印。銅質精純。土花斑駁。度以宋三司布帛尺。長二寸一分強。廣二寸一分弱。博五分。重今權十又三兩七銖。柱紐高一寸二分。縱徑九分。橫徑四分。中刻上字。背右方正書宣課行三字。左方乙未年三月日造七字。左側景州印三字。篆文屈曲盤迴。正書亦古拙有致。但有鑄造歲月。無年號。蓋蒙古太宗七年印也。是時爲宋端平二年。蒙古未有年號。國號。但以干支紀歲耳。其曰景州之印者。按隆平集所載。宋制。凡節鎮有節度使印。隨本司關。則州本吏用本州觀察使印。又有州印。文曰某州之印。金時節度州印三。曰某州節度使之印。曰某州觀察使印。曰某州之印。元初官制未備。景雖刺史州。而未有常員。州印尚仍宋金之舊。歟。其曰宣課行者。攷元史百官志。太宗始立十路宣課司。選儒術用之。金人來歸者。因其故官。若行省。若元帥。則以行省元帥授之。蓋時始有宣差徵收課稅之使。大興翁宜泉比部藏一印。曰旁差官印。背文無年月。但云宣差襄陽唐鄧軍課稅所成造。是課稅所亦掌鑄造之事。地理志。河間路景州。唐觀州。又改景州。宋改永靜軍。金仍改觀州。元因之。至元二年。復爲景州。據此。則太宗時不應有景州之稱。然太祖紀。八年癸卯。取雄霸。莫安。河間。滄。景。獻。

深、祁、蠡、冀、恩、濮、開、滑、博、濟、泰安、濟南、濱、棣、益都、淄、濰、登、萊、沂等郡。又十六年辛巳。宋京東安撫使張琳以京東諸郡來降。以琳爲滄、景、濱、棣等州行都元帥。鄭義傳初事太宗。佩金符。山東路都元帥兼景州軍民人匠長官。從伐金。子澤襲。年老。弟江代其職。世祖北伐。賜金符。兼景州軍民人匠長官。中統三年。以江子珣爲千戶。領景州新簽一軍千餘。皆稱爲景。且按世祖紀。至元二年閏五月。升蓳縣爲景州。止言升縣爲州。不言改觀爲景。元混一方。輿勝覽刊於世祖朝。景州沿革。亦不書至元改名之事。又大甯路亦有景州。潛擊堂跋云。大甯路亦有霍州。景州。史志無之。此書亦未詳其沿革。姑記之以俟攷。是或當時旋置旋廢。偶存其名歟。且大甯非財賦之區。而景爲金鐵所產。此云宣課。其爲河間路審矣。酒志與紀傳歧互。頗滋疑義。殆草創之初。輿地名號。未能歸一。逮中統五年。省臣奏請分立省都。四方正名。而後爲定制歟。其以乙未爲太宗七年者。攷太宗六年甲午。滅金。得中原州郡。七年乙未。置版籍。頒發州郡牌印。正其宜矣。又攷食貨志。元之諸稅。皆定于太宗時商賈之稅。甲午年之課稅所。大都宣課提舉司。迄諸路。皆定歲入之額。此正足與旁差官印相證。其皆爲元初制矣。若遼南京析津府景州。置於興宗。重熙中。重熙二十四年。歲在乙未。金之景州。先爲河北東路。後屬河間。改觀州。在後廢帝。太安中。當世宗大定十五年。未改州時。歲亦在乙未。然皆宜有年號。且與宣課之稱不合。故定以爲蒙古印耳。

詩十五首見蘇閣吟卷

雲林寺

吳壽陽

靈鷲何岩岩。清勝擅幽獨。古寺山麓間。到門途屢曲。泠然一泓泉。澄流漱寒玉。清淺不可唾。搥之未盈掬。奇峯飛片雲。穹然架佛屋。複洞挂巖顛。危石剖崖腹。莊嚴五百尊。山骨何時剗。上有古經牀。祇樹敷春木。幾處婆羅花。紛紛慘輕綠。寺僧解嚮導。相與殊不俗。西澗更追尋。新篁夾修竹。鮮翠滴人衣。蒼煙俄滿目。日暮整歸鞭。綠雲猶可束。

秋日寓葛林園次奚丈鐵生韻

頗厭城市煩。山居滌炎燠。疎雨滴新梧。輕煙挂修竹。半榻借僧寮。一燈近佛屋。高人肯來過。相與慰幽獨。懷古登層阿。捫蘿徧深谷。猶有白雲屯。山樵閒共宿。

文待詔爲王槐雨侍御寫拙政園圖圖爲陸魯望故宅圖分藏吾鄉胡上舍爾榮家

五湖煙水鷗鷺邊。長虹渺渺浮遙天。黃柑綠橘霜林媚。一笠扁舟動秋思。甫里舊蹟葦鱸鄉。夢隱卜築開溪堂。輞川清曠雲生戶。但見槐黃落如雨。寒泉一眼渟澄空。花磯羅磴泉皆紅。湘波滿地瀉翠玉。寫出千竿萬竿竹。林巒如畫畫如詩。筆妙惟有衡山知。七十二峯羅几案。割取煙霞纔一半。王公本是非常人。文安有力扶直臣。閒居灌圃全清節。爲政焉能更辭拙。君不見吳郡昔著豸冠坊。范公諫聲天下彰。又不見黃州南園斬一醉。功成那復論榮悴。攜得白雲歸去來。待詔有歸去來辭圖。故園夢醒對三槐。細想清風臨頓里。北禪夜靜鐘聲起。

東坡先生鹽官四絕句殘碑

安國寺前雙檜樹。矯若二疏辭漢去。延恩寺裏賢師琴。目空退之無古今。當時四海一蘇子。擔笠瓊雷寄
儻耳。杭州出守到鹽官。大悲作記儒通禪。與酣清詠動高閣。腕底濤聲天際落。揮灑墨妙驚老僧。神采外
映中藏。稜傳刻好事留貞珉。何年流落明湖濱。有美堂前秋潑翠。古石飛出吳山雲。土鄉主人雅好古。忍
使零圭蝕苔土。扁舟載過蘇閣中。醜翻芸編日爲伍。家君得宋槧。百家注東坡先生集。因名藏書處曰蘇
閣。憶昔先生遷黃州。尋春亦復城南游。先生有黃州安國寺尋春詩。小房曲檻合修竹。何如散髮披襟臨
風浴。獨有眼力窺天人。脩行無物撻世塵。埋雪蒼龍凍不死。幻作神犀騰扇底。東南文士知所歸。學儒學
佛通其理。鹽官不可無公詩。望湖兼以拜公祠。梅守賜墨出淳祐。廟側同此尋堂基。響榻氈惟日千紙。殘
字猶將補栗尾。寺門清暑搖白蓮。齊豐香市記年年。重將遺墨表靈瑞。定有萬丈祥光騰妙智。家君擬重
摹一石置寺中。

過陳簡莊徵君紫薇講舍

背倚蒼厓閣一間。雲生北牖抹煙鬟。放翁詩句堪移贈。買宅錢多爲見山。講舍築於硤石西山麓。
新坡舊業本黃岡。卷軸丹鉛說士鄉。土鄉堂先生塋上藏書處。重繼白公吟眺地。紫薇花下讀書堂。

舊藏英石立峯高二尺許。係插花山馬寒中先生故物。賦此紀之。卽用先生集中曠野看雲歌韻。

吾家有石瘦而奇。嶙峋三尺芙蓉垂。彷彿花山花底壓。倒折花枝作雲腳。英德靈產高丈尋。美人袖舞雲
鬢明。小峯峭立衆峯亂。也復煙霞成片段。南樓道古箋魚蟲。仇池兼伴吟香工。海山檻外勢奔走。想得風

篋同攜手。占鴻漸兮甯高飛。樂磐石兮其來歸。寒中先生筮易得漸之二爻。因以衍齋爲號。並有坐磐石小影。

丙子歲除前六日過吳門訪黃蕘圃主事于士禮居賦贈二律

雪滿楞伽又歲除。乍從江夏識林居。千秋盛業歸求古。三世交遊重訪書。閣建長恩嵐翠列。主事嘗欲建長恩。聞於虎阜。傳員嶠墨光舒。抵今故蹟摩寥處。展對雲山愴有餘。先君子嘗爲蕘翁作員嶠訪書圖。時適攜員嶠真逸印。因以爲贈。

數卷遺經獨抱殘。延津敢望劍雙完。甯知百衲成琴易。未使千元集古難。董氏全編供合校。重言片帙輔精刊。時方校刊周禮。鄭注以明董氏本爲主。而校以各宋本。假余家舊藏小字京本。重言重意。合勘。余家本。明春官及夏官上。蕘翁出小字宋本。夏官並秋官上。許歸余補入。更望並得春官。成全璧焉。新年好向梅花祝。歲曾刊梅花喜神譜。更與春風補一官。

贈家枚庵先生

槐市幽棲比鶴巢。先生居吳之槐樹街。高風幾爲俗情消。商山此日方山子。萬卷藏書手自鈔。先生祖籍休甯。系商山派。家藏書皆手鈔精本。先君嘗以方山子相擬。

寒公寂後邈煙霞。望裏支硯水墨餘。嘗舉詩社於支硯。與釋寒石唱酬尤密。珍重篋中詩畫筆。深山雨過落松花。先生嘗贈先君子畫扇。並題句云。泱泱泉流漾淺沙。深山雨過落松花。間來偶踐山僧約。留得先

春願渚茶

中秋前四日海鹽張棣谷以秋濤古琴見寄

無絃幾識響桐聲。忽枉金徽致逸情。一曲清風來海上。滿天涼月晚潮生。

丁丑三月望日從臨江鄉魏小洲處接葉東卿去臘寄書並烹平石經論語殘字

西湖草綠柳飛絲。已過江南穀雨天。孤雁唳違經隔歲。書爲鮑牧堂攜致。余與牧堂別三年矣。同心相望路三千。奇文曾錄團橋外。東鄉曾刻軍溪學士所摹太學石鼓第八殘文。殘石重蒐廣政前。卻憶臨江蕉萃客。何時商略共遺編。小洲嘗得蜀石經毛詩殘字。先子曾摹副本。並著考異二卷。未及付梓。小洲擬刻先生遺著。亦未果。

朱西村先生墓次張石樓韻

高隱不可作。遺邱千古尊。青山白雲外。梅鶴與招魂。月冷瀛洲社。風清處士村。招來華表客。猶憶嘯臺孫。時石樓有追懷太白山人詩。

黃岡古錢歌道光二年九月二十九日黃岡石佛寺橋農家於麥隴中得古錢一瓊。文多五銖。間

有常平五銖。大貨六銖。五行大布等錢。皆南北朝物也。按鄱陽泉志。梁武帝鑄錢。肉好周郭。文曰五銖。張台曰。五銖錢皆無好郭。惟此一種有之。此五銖徑漢尺一寸。稍贏。重今權九分。稍弱。肉緣較闊。幕有好郭。殆梁製歟。常平五銖。鑄於齊文宣天保四年。大貨六銖。在陳太建之六年。

攷南史顧越傳所居新坂黃岡世有鄉校家傳儒學仕梁陳卒於太建元年此豈其後人所遺耶閱今千三百有餘載翠采赤斑鮮妍欲滴摩挲賞玩足證新坡遺蹟爰賦此以詠諸論古者黃岡水木秋明瑟古寺溪橋趨石佛稻雲被隴漸登場宿麥抽秧新啓塏腰鎌忽訝土痕移觸手俄驚破甕出繡鋪碧草色斑斑彩炫青蚪風拂拂村童撲滿直相當購置書窗名品列製沿孝建或僅傳聞尙有二銖四銖等錢模改齊宣時可悉貨泉並得稽師利大布還稱彌羅突就中獨數五銖錢珠貫纍纍餘百十圍徑慮屨寸稍贏重不及今銖之一幕有好郭漫無郭肉篆分明輪緣闊紀年應與湖蕭梁女稚角錢堪共說緬懷江左幾滄桑紛紛南北輸軍實中都銀幣革東昏流轉三吳貨充溢一自江陵敵餒駙歌闌敕勒邊聲切銀甕難椎玉壁堅石頭幾下金陵缺空餘洲苑鎮錢龍安見柱文堪易轍於時耆舊老邱園新坂家學惟傳述兩朝講幄秩胥崇北使東歸彌守潔時經太建又歷年不數字文更幣日蕕藏或又後賢遺簾金豈是編金埒孤燈落日寒煙碧遠水浮空嵐翠活叢林廣福湖遺碑太平廣福寺碑元至正三年沈景顏撰文齋伯和書依稀鐘梵雲山徹家藏太平鐘梵畫幅款署石谷卻憶當年楊殿間夏畦過雨兼飛楔復有具區源百斛黝然太古并州鐵先人歌詠志遺聞遠寄紫芝僧考核乾隆乙未楊殿村農於雷雨後土中得雷斧及古錢數十千皆趙宋時物先君賦瘞錢行紀事乙巳歲早太湖水涸土人於湖底掘得獨木舟一中有梁五銖鐵錢三百餘千先君購得百餘特以數枚寄周耕厓先生都中爲賦長歌祇今故物同陳迹慨想流風滋哽咽遺編三復瘞錢篇書塾試從追往昔黃岡書塾額元周伯琦書

附詩五首見雲根室偶存稿

朝登萬蒼山望永安湖

吳之淳 歸鄉

夕息溪灣舟晨尋溪上嶺躡屨緣坡陀停策披榛梗叢篠暖新雲喬林耀初景飛泉濺足清浮翠侵衣冷盤紆徑漸微步仰飛鳥引探奇景不延濟勝力偏逞絕頂一振衣曠區重引領遙青迎列峯秀綠挹修畛迴渚開煙光重湖出鏡影漁舟繞菰蒲野鷺掠萍苕目送山閒禽啼入柳陰靜疎花明倦眸遠鐘發深省心會多妙理情移無止境孫登隱蹟遙許掾遊蹤泯願追高士風重泛湖中艇

程孝子行 硤石程翁昌期字秋雨以孝行稱鄉里年八十同人擬稱觴爲翁祝翁辭焉而以生晚

爲言痛思古人親沒遇生辰不忍置酒張樂以避生也翁之意合乎古人益以見其孝思之永矣爰爲賦孝子行云

程孝子生寒素質土山中築親墓夙懷風木悲還撫塚間樹年且躋耄耄心猶切孺慕慕親日日展親塋春露秋霜頻心驚時過若駒隙事死常如生子事縱盡禮親死長已矣蓼莪偶誦哀頓深鮮民生誠不如死於今大德臻大年客來擬賦稱觴篇孝子敬謝客致辭先泫然人無父母生日倍悲痛此程伊川先生語祖訓夙承溯宋賢身不及舞老萊綵詎忍醉吟香山筵惟慕泉明自輓意聊冀知交情見一死前我聞此語因追憶相與交已三世歷不須更作北邙歎更頌南山什古之遺孝永名世無極特表程鄉百世式

擬唐人贈遠

別時見楊柳。歲暮未還家。君看風前雪。還如楊柳花。

秋日登學宮尊經閣

林杪出書樓。梯雲到上頭。煙光萬井暮。砧響一城秋。檐瞰浮圖聳。窗銜碧海流。一登衆山小。遐想聖門遊。

題蔣生沐廣文雪艇傳牋圖次韻

消寒合尊坐相促。不供醉吟徒醉伏。吾人愧乏梁園才。白雪歌高難再續。聞子呵毫獨鍊詩。滌筆冰甌。飮筍腹。辭彈韻劇倡屢和。新詠能砭俗耳俗。郵笥傳誦如樂天。香名勝飲防風粥。想得溪船夜棹回。手裂看詩還把燭。畫師解傳詞客事。帆滿寒雲見飄沐。鵲湖渺渺接錢湖。雲樹模糊共遙矚。君詩多疊錢唐汪丈劍秋見酬韻。我家陶舫曾載詩。細雨東風一莢綠。陽羨吳菊畦處士曾爲先大父作載詩圖者舊風流杳莫追。畫中洪濶空馳目。

